


天水郡趙氏族譜

卷末上







上海图书馆

登记号码

00945427

先世藝文





趙氏重續族譜卷末

奉訓大夫德彰趙公墓誌銘 本老譜


承務郎登州福山縣令雲騎尉賜緋魚袋張邦彥撰

朝散大夫行棣州商河縣令騎都尉賜紫金魚袋曹將明書

朝奉大夫忠順軍節度副使兼蔚州管内觀察副使騎都尉賜紫金魚袋山夢

弼篆蓋

萊陽趙君德彰既歿之二年正隆戊寅春其孤糖使其二弟植樸走福山以書來告曰糖先君孝友於家信厚於朋友媿睦於宗祖惠施於鄰里鄉黨愷悌慈祥出於天性糖兄弟蒙義方之訓咸得列於仕版足以承意色備芳旨問安視膳以盡養志之誠不幸先君壽不登七十蓄德蘊用不克少見於當世而歿嗚呼罔極之報其無以自致矣惟葬之以禮庶幾少竭哀痛之思其或溺於巫史怪迂之說年月方隅之禁不克以時襄事違古悖禮糖竊陋之將遂以今歲十月二十日丙午葬於縣之來鳳鄉鳳棲里先塋之次凡陶埴工築與夫遣紼窆封之須物色咸備獨幽堂之石未有其銘伏念先君晚所與遊莫如子厚子其誌之僕自顧衰齠固陋屏棄毫楮其何以副哀勤之託然自曩者以疾去職棲





伏海上，今十有餘年，羈旅貧窮，人皆掉臂而莫之顧，獨德彰傾蓋相遇，洞開心顏，抵掌談笑，無一毫疑閔，其於僕也誠厚。雖文溢意拙，不足以發揚君之萬一於義，有不得辭者焉。君諱常，德彰其字也。世為縣著姓，曾祖沂，祖從禮，皆隱德不仕，考僅始出從官，以宣義郎致仕。妣李氏，宣義公三子，君其季也。幼而有成人操，器度凝遠，於經史無所不涉獵，而獨喜論兵。尤邃其書，宣政間設武舉於郡學，以三舍取士，君每試輒入優等。輩行莫能先者，無何宣義公捐館，乃歸服喪於家，哀毀癯瘵，杖而後行。既除，猶不忍以進取為意。家故饒，家伯仲議析其產，君悉讓其甲第華屋，獨取陋舍十數楹居之。其他囊楮器用，亦皆以其兄滯敝窳者自昇，初未嘗屑屑懸度重輕也。會歲飢，民艱食，君諭還流亡，因其力以新所居，傭值優贍，媪穉兼濟，活飢者甚多。其後軍旅寢興，詔諸路貢材武士，君謂其所親曰：吾可以舊學自奮矣。始復求試於有司，義策馳射俱第一，首被薦送而道路已屨塞，不果自達。士友惜之，未幾巨盜蜂起，携孥避地於鄰郡，久之得還，而城邑煨燼，農畝盡廢，米翔踊至斗數十千。君收卹宗族之尤困者百餘指，與之居，甘苦豐約必均，未嘗有怠意倦色。伯兄歿，君事其嫂以禮，撫其孤女三人，以慈恩意周洽，不異所生。既又皆為辨妝奩以嫁之，從姪死，婦寡處無以自



存亦名而育之於家君敦睦曲至大率類此而又輕財好施急人之難樂於赴救有古風烈韋昌間縣令邵章嘗貸民粟以紓軍需之急其直蓋二百萬有奇不能以時償其民民語稍洶沸而郡掾盧子益者與章有隙撫十它事譖諸其守守怒置章於獄章之子夜叩門泣見君曰吾父方誅於讒怒不能自直倘民訟騰諸郡則負累滋重將不可為矣惟公哀之君惻然動心明日救召其人語之曰令所負吾身任之毋若是其紛如也君之信素著眾無復異議乃悉發私廩代償之酒官翟宗古坐事為郡所窘遣吏逮之甚急宗古惶懼求救君匿之田舍而以百千貸其家且徐為之經營事竟得解嗚呼如君者其所謂勇於義而不讓於仁者與若夫君之治家則和裕而肅莊事煩大皆有條理兵火既息里閭寢安即勵諸子以學且誨之曰國家每三歲下書舉文藝之士四方髦俊彈冠並出而吾家尚未有登名於朝者爾等其有以副吾志乎於是各領帑資市書史延名儒俾之師友皇統丙寅二子植格遂聯名擢進士第餘亦累上禮部聲譽藹聞於中州植初調寧海軍司理格亦調登州司法以便親養君往來二郡間每閒暇則訓勉之曰獄與法所係甚重倘不以平反欽恤為務苟免於吏責顧豈能無媿於心至於持身脩己則清心慎獨思躋於廉白從政之要盡是



矣。會民輸歲租，漕司以登之，受納委於格，而郡吏因緣聚斂，以醋息為名，且循久例，分所獲三之一以誘主者，命之曰答送。君以為不可，遽命格却之，未旋踵，朝廷遣使廉官吏之臧否，格遂以清潔稱。君之達於事，可謂詳且遠，其所以誨其子者，可謂周矣。植秩滿，再調為唐州方城令，格為河南府錄事，皆請迎侍以行。君曰：爾等吏事，寔以明習不違吾素所誨爾者足矣。吾衰且倦，不可以遠適。喜治堂宇，規榭宏邃，甲於鄉曲，而好客忘倦。有陳遵鄭莊之風，至是益新其齋，厨亭圃藝，松竹雜卉，日與舊親。耆情為棋酒之樂，以逍遙肆志。世故若無足累其心，如是者數歲，以疾卒於正隆元年八月癸酉，享年六十有六。方其化也，命侍者進粥，如平時，召家人與訣，永無驚怛。雖方外遊禪之士，有所不及也。娶同縣張氏，有賢行，凡齊家教子，佐君之力為多。男五人，長糖，以弟登六品。於法得廕，今為進義校尉。次植，次格，官皆承奉郎。勳皆飛騎尉。緋衣銀魚。次樸，次檜，以兄廕皆補初品。謁告家居，泮厲素業，方期自顯於文儒。女二人，長適進士紀玠，次在室。孫男八人，曰三錫、三益、三畏、三俊、三秀、三戒、三捷、三德。孫女三人，皆幼。曾孫男一致遠，初君之考宣義公既葬，獨大父之喪偶，以故未舉，而君之長兄平亦久客於殯，君屬壙之言不及家事。丁寧反覆，惟以是屬其諸子。糖等恪奉。



遺訓因君之葬序以昭穆併歸之兆以成君之素志焉嗚呼士之出處有義有命而世之姦愚庸妄擾擾經營列鼎結駟苟以自快一旦榮華銷歇芥豸泯默孰若君履德秉義雖晦於厥躬而承家襲美克有賢嗣接武聯裾品服奔奔蓋將震耀以興厥世較彼與此其所得何如哉銘曰道有出處匪利惟義微仁且勇昌濟其志孝友豈弟允叢於身區區人爵何有蚊蠱猗歟德彰俯仰無負雖晦厥初實大於後五子待側朱紫煌煌源深流永愈遠益昌鳳棲之原可營于室作銘幽宮以待其必

昌陽戰松刊

隱德居士葬後三百六十八年為大明嘉靖十二年春二月為盜所發其十五世孫文耀繼下收拾遺骸見誌石陷置北壁蓋置東壁因錄誌銘並篆以出至二十五年冬十月始附錄於譜元孫文耀百拜謹誌

二十世際昌曰余抵下瑩拜雙進士府君墓而德彰祖墓竟不知所在當日原穴題名石一片我鳳里祖既錄誌矣向使隧前得石一塊寧使弔祖者猜度莫決也余久欲商族之尊長辨其墓無疑矣而墓前豎一碣尚未知如願否今先梓之譜



天水郡開國伯趙公墓表

本老譜及老縣志

朝散大夫行太常丞騎都尉富春縣開國男食邑三百戶賜紫金魚袋孫人傑

撰

承直郎充尚書省令史武騎尉賜緋魚袋張子獻書丹并篆額

大定二十七年正月癸亥少中大夫前汾州觀察判官致仕輕車都尉天水郡開國伯食邑七百戶賜紫金魚袋趙公以疾卒於萊州之私第享年七十有二越明昌三年正月丙午葬公於萊陽縣來鳳鄉鳳樓里韓村之先塋迨承安五年春公之孫致遠調官京師稱其父命來請於子曰先少中大夫卒葬既久其內姑表弟嘉議大夫前益都府推官致仕張公秀實嘗誌而銘之納諸壙矣獨未立碑以表彰其隧且俾四方視聽願有序焉予占籍即墨而公家萊陽是為鄰邑松梓相接聲迹密邇知公為審不可以辭然公之世系譜牒出處行治詳見於內誌故此或畧姑著其大概云爾公諱植字彥立為萊州萊陽人號顯族曾大父從禮潛德不仕大考僅宣義郎致仕考常累贈奉訓大夫妣張氏追封天水郡太君公幼不嬉戲以勤自將稍長親炙師友服膺簡編至忘寢食年方志學即求試有司弗售輒杜門却掃益憤讀書甫冠遂以所業首薦於鄉既壯



與迺弟格同登進士第，歷寧海軍司理參軍，唐州方城縣令，知鎮戎軍，盩厔寨，遭父憂去職。服除，充鄭州防禦判官，以峻除姦弊，反為邪險構扇，媒孽官謗，坐是左遷德順州司獄，復為鳳翔之天興、萊州之掖二縣令。旋丁內艱，終制，充汾州觀察判官，代還告致仕。以年概七十，朝廷可其請，超授兩資，仍給半俸。公在縣先有祖產，而郡城嘗置別業，安車往來，勝日燕集，朋舊相歡，放懷事物之外，深得林下趣。初，公昆弟五人，伯禳、季檜，既以公故得官，而弟樸復以弟格廕入仕，雙親在堂，同氣無恙。歲時伏臘，羅拜上壽，雁行列進，命服煌煌，照映庭戶。見者榮之，公以為東土鮮儷，厥後相繼淪謝，惟公強健，僉謂必享晚景之福。其壽祿未可量也。無何，掛冠家居，星再周天，遽捐館舍。士論惜之。公元配孫氏，繼室官氏、鄭氏，俱追封天水郡君。最後娶呂氏，有郡封，亦在天水。一子曰三錫，孫男三人，長致遠，忠武校尉，守濰州昌樂縣務，海都監武騎尉。次致祥，承奉班祇候。番七次致壹，曾孫男三人，俱幼而未名。女七人，二嫁士族，餘為處子。公孝於親，友于兄弟，撫諸猶子，愛均所生，宦遊四方，往往絜以從行。為之婚娶，教育甚至。迨其成立而後已。凡宗族姻舊，敦篤不已。有寸長可錄，則力務擢揚。或困厄可憐，則必加濟援。大抵以成人之美，周人之急為己任，非出於勉強，而要譽於鄉。



黨朋友也。公容貌奇偉，傑出輩流。望之毅然，若不可犯，即之也溫。言則開露誠，腑了無猜忌。好潔衣服，飾車騎，齊家奉身，奢儉中禮。其涖官行政，寬猛適宜，弗拘小節，務存大體。意度凝遠，眾莫涯其際。而竟老於州縣之職，胸中素蘊多未克施。倘使早據要津，任極其才，而所可考者，將不止於此。噫！士之懷才抱藝，有致君澤民之志，期於顯達，立功策名，作不朽計，不幸不遇窮死岩穴，與草木俱腐，弗小見於世者，可勝道哉。嗚呼！公乎，可謂能粗行其志，斯亦足以無憾矣。乃為敘述，俾歸而刊諸石，因屬以銘。銘曰：猗歟趙公，才德兼隆。平生所勵，惟孝惟忠。幼不見戲，長好學問。壯歲登科，善於從政。煩劇屢試，遇事敢為。除姦革弊，上官見知。綿歷三紀，竟老州縣。弗據要津，底蘊未展。年甫七十，掛冠歸來。幅巾杖履，優哉游哉。兄弟五人，俱在仕路。相繼沈淪，晚景獨步。身既康強，遐福可量。日月幾何，遽爾云亡。克享祿壽，止此而已。志亦粗行，復奚憾矣。公之餘慶，其興後昆。刻辭揚美，或慰幽魂。

天水郡開國子趙公墓表 本老譜縣志

大金中順大夫同知寧昌軍節度使兼懿州管内觀察使上騎都尉天水郡開



國子食邑五百戶。賜紫金魚袋。趙公既卒之明年，其孤三復走北海告子曰：我先人去歲，自官守奔祖母太夫人之喪，東歸抵此。十月十日，以疾卒於姻家萬登仕之客館。諸孤扶護還里，倉卒中權厝於趣果佛寺。我家世父以卜今年九月二十七日，祔葬祖母太夫人於先大父承直之兆。我先人當從葬於其次。幽室之石，禮部郎中郭長倩已嘗誌之，而墓表未立。我先人與公同年友也，而又聯姻婭之契，願撫其實以序之。將與石人虎羊之儀，以揭於外。庶幾少伸人子罔極之恩。子應之曰：雖不敏，然予樂道人之善，義不可辭。公世為萊陽望族，皇統丙寅，與仲兄植同登進士科。公初守登州司法，叅軍秩滿，調河南府錄事。次知晉寧軍神木寨，賜銀緋，不兩月，丁外艱去官。服除，遷鳳翔府麟遊縣令。未滿石，為尚書府刑房令史。歷五十有二，以勞遷大理寺司直，後復得外除，任彰德軍節度副使，兼相州管內觀察副使。既代，充西南路招討判官。一考還堂，授都水監丞。及瓜，改同知寧昌軍節度使，兼懿州管內觀察使。散官勳爵皆至正五品。享年六十有二。公諱格，字彥至，隱德不仕。諱從禮者，於公為曾大父也。任揚州觀察推官。後以宣義郎致仕。諱僅者，於公為大父也。累贈承直郎諱常者，於公為考也。天水郡太君張氏者，於公為妣也。考妣官邑俱以公恩得之。昆季五人，公



處伯仲之間，既敬且愛。凡三娶，初娶同縣張氏，次娶東萊曹氏，後娶太興張氏，皆著淑行，並封天水郡君。前張氏曹氏先公而逝，亦祔葬於公之幽室。三男，長曰三復，藉公廩補供奉班祇候，南京昨城縣商酒同監，次曰三恕，三處皆未仕。一女適余長孫中庸，是也。公入仕，三十有三年，為人不好嬉戲，儻有大節，事父母孝，與朋友信，清白視身，工於文學，敏於政事，所至皆以能稱，而去則見思，嗚呼！若更天假其年，而勲業未易量也，是豈命也，是可哀也。夫，大定十九年九月二十七日。

中順大夫前定海軍節度使兼萊州管內觀察副使上騎都尉濮陽縣開國子食邑五百戶賜紫金魚袋吳似之述并書

奉議大夫行海州朐山縣令隴騎尉賜緋魚袋張秀實篆額

造碑刊字人青社單松年同弟單椿年并寧海孫俊民

保義校尉趙君墓誌銘

萊陽趙檜，字彥壽，諱從禮之曾孫。揚州觀察推官，後以宣義郎致仕。諱僅之孫，贈承直郎諱常之幼子。母曰天水郡太君張氏。君幼以詞賦舉進士，五貢於鄉。大夫後以仲兄植，廕補供奉班祇候，為靠宮支燭都監，後為登州府福山縣商



酒都監受代還里而後曰大丈夫安能稿坐於官庫間爾浮沈里中日與故友相娛不復以仕進為意大定十一年四月十有七日以疾卒於家享年四十有六娶脩武校尉王文煥之女生四男長曰三畏次曰三省三德三捷一女適修武將軍劉聰男彥休三省早夭餘皆克家貲致潤屋有子如此豈非君之積德而天報於後耶以十九年九月壬午徙葬於先塋之次銘曰世之積德天報甚明厥躬不享其後必興椅歟趙君壽雖不永有子克家優游里中刻之堅石以闕幽宮

登仕郎充登州軍事判官董清臣撰并書

大明崇禎七年十二月初六日族孫二十世際昌同姪洵孫仲模壙中錄出謹記

順天府通判商鼎趙公傳本縣志

公諱鉉字商鼎操履孤介問學淵源邑咸宗之叢尚書蘭曲侍郎銳皆出其門登成化甲午科鄉試尋以親年高選授順天府同判廉明慈惠民戴之如父母居一歲而疾作時有富室潛以祖軍欲移於他姓之貧者間持百金冀易軍籍戶名公時伏在牀褥厲聲曰故為爾祖軍與伊何預吾素非脫富役貧者肯利



爾餽以坵吾清名累吾子孫哉。陞麾使出辭畢氣絕僚屬為具棺殮篋無餘貲也。子雲龍庠生衛母伏劍旌表孝子孫桐由舉人歷順德府同知曾孫密由舉人任獲嘉縣知縣。


直隸順德府同知趙公墓誌銘 本老縣志

賜進士及第光祿大夫東閣大學士兼吏部尚書加三級紀錄七次通家生徐階撰并書

賜進士出身通奉大夫禮部侍郎教習庶吉士加三級紀錄五次年家侍教弟

寧春芳篆蓋

楚材諱桐姓趙氏世為山東萊陽人金進士開國伯植公之十五世孫也高祖英輸粟千石賑飢旌表義民曾祖慶助賑五百斛欽授散官祖鉉舉人通判順天沒於王事父雲龍庠生贈安肅縣知縣正德六年值流賊之變以身衛母伏劍死母宮氏銜荼茹葉垂四十年忠孝節義萃於一門識者知趙氏之必昌也楚材生而穎異天性尤篤失怙時甫六齡痛父殺身成仁即誓不欲生母以是愈鍾愛之日夜訓誨恒至達旦十歲九經俱成誦文章卓然可觀一時有神童





之月十三縣試冠軍旋補弟子員次歲考列優等食餼宗師徐公三江名士特加賞識賚予甚厚二十三以五經魁東省步金門上玉堂指日事耳詎意累試春官不得志三十五以親老家貧不能供甘旨乃就銓吏部籤掣直隸保定府安肅縣知縣下車之後即迎養老母事無大小悉稟白焉安肅文風久不振楚材於學宮旁構置書院一所延師教讀暇則親自講解凡承訓誨指示者品學靡不兼優越三載中式鄉試者數人興學造士厥功偉哉邑屬衝衢夫馬供應草料攤派及一切辦公之費苦累百姓者俱申請上司永遠裁革歲飢請賑格於部議不准乃捐俸賑濟邑中好義者競助之施是以鄰境飢民揭竿而安肅一邑安堵如故邑有巨滑占人田產伯人妻女為四方逋逃數者且數十年前令恐致事變置不敢問楚材乘其慶賀率壯勇親往擒之置諸重典遠邇無不稱快邑西鄙李家村李良女有姿色原許字王生者相富室黃炳見而慕之誘李昧王生親與締姻焉楚材偵知其實立拘到案黃以千金李以五百金浼人買直楚材佯應之而斷令女與王生當堂行合卺禮並賞以李黃之賄金千五百兩謂李黃曰爾俱應斥革枷杖以金故置不問今王生已入泮食餼前程正未可量也邑多刁訟楚材燭照如神凡准一詞俱令原告自拘隨到隨審案無



留牘而亦無寃民其他善政不可枚舉任四載雞犬不驚幾致刑措旋以卓異陞順德府同知去之日老幼男女簞食壺漿盈滿道左以數十里之地三宿而後出境而且邑人悲失慈母為立生祠以祀其所以感人者固可想而知也至於順德之同知缺不過一閒曹耳楚材到任適郡守老且病一切事悉委辦理而屬下諸要案及上控疑案尤非異人任所謂知府者僅以守府而已任二年御史獎者三巡察獎者四撫安注上考者三司道注上考者再大名缺出方擬擢用而瓜代者忽自天降眾皆愕然不解其何由久之始知當道者六十大慶其黨約與為壽楚材拒之太甚之所致也或勸之少自貶損猶可挽回楚材曰造物不予我以脂韋之骨誠不能為五斗粟折腰嗚呼操守若此不亦可以無愧矣乎予己丑分房得楚材卷疑為宿儒及來謁乃一少年喜留數日旦夕講論終莫測其底蘊談及當世之務尤為切中時宜蓋不待泄政親民而其所樹立者固可以預知之也前歲楚材解任予日望其來都聚首以慰飢渴詎意遲之至今而其弟梓竟持狀來乞予誌銘也嗚呼惜哉嗚呼痛哉按狀楚材卒於嘉靖二十八年七月十六日得年四十有四娶于氏例贈封宜人子二長憲娶張氏次容庠生娶王氏女三俱在室將以嘉靖三十年四月十九日葬於鳳棲里




先塋之次。予誼屬通家，不可辭，亦不忍辭，乃為之銘曰：幼而失怙，順厥慈親，長而事君，允為蓋臣。終不附勢，厥惟完人。忠孝節義，萃於一門。以紹前徽，以啓後昆。鳳棲之原，縣河之濱。營爾幽宮，庶慰貞魂。

陝西按察司副使趙公墓誌銘 本老縣志

賜進士出身光祿大夫兵部尚書王崇古撰文并書丹

趙公諱文燿，字綱夫，別號鳳里，祖家東海萊陽郡，傳稱東海世家，多磊落倜儻之士，負氣豪邁，行不詭於流俗，有大丈夫風，蓋得山海渾灑之精，毓為人文，公其一也。公族自宋世，歷元季十四世，祖名植格，兄弟登進士，代多名宦。至明初，為郡故家。高祖勝，曾祖銳，祖漳，考教授君松，於宏治十七年八月二十二日生。公於永年學宮，公賦性穎慧，七歲教授，公授章句，即領大義，十歲善屬文，十三能賦詩，十九補縣庠弟子員。嘉靖乙酉，以尚書魁東省，累試南宮，學益充邃。辛丑登進士第，與予為同年友。授戶部主事，督餉天津，廉隅自飭，糾正府衛夙玩，上下憚之，乃迎二親就祿養，承顏舞綵，親用底豫。適教授公卒於官邸，公哀慟骨立，扶柩歸，卜兆襄事，封樹如禮。既免喪，赴闕復除戶部郎，以考績勅贈父承





德郎封母太安人尋擢員外郎司帑藏出納惟允人莫能干以私既以才名擢山西按察司僉事分巡口北道往上谷時虜患孔棘適大虜逼鎮城近地軍民避虜趨城下幾千人守帥嬰城莫敢開壁公毅然關四門盡納軍民全活甚眾邊人尸祝焉嘗出邊督建整堠遇虜猝至督兵戰却之蒙恩賚金幣庚戌虜犯近郊詔遣大將軍仇臨邊視師恃寵跋扈公執抗不為禮仇亦敬憚疏薦其賢在鎮肅紀飭兵裕餉製器力雪故帥之冤却餽謝居二載脩極勞瘁進奏議仍分守故道廟堂推松畧當需次開府時有要公干謁時相速化者公婉詞拒之會詔選各省民兵援薊門乃擢公憲副督山西兵守喜峰口既罷兵改除薊州兵備治軍嚴肅負氣剛介不能俯仰巡關使者誤有指摘銓部廉其無他擬調任公奉母歸里親友勸出補乃即春聯述所志表其閭云大地春回忻見天恩蘇萬物慈顏年邁忍將日養易三公遂杜門日奉太安人起居羞澁備極懽愉居數年痛兄弟先後逝諸侄息婚嫁極力營辦為諸侄咸治產供贍比歲大飢盡出積粟賑貧乏有差全活甚眾開館授諸生分經校藝戒記誦俗學務令博洽嘗為學約云通儒不可以一經目全才不可以一藝名體備用裕終身受用不盡鄉賢士登科第者多出其門憫鄉邑差賦繁重民力不支達當道稍從容哀



益出資樹學坊脩祖社仗義樂施雖室無厚積竟鮮中顧宗族稱孝義焉歲已未太安人卒公盡哀備物祭葬以禮既禫除親友勸之仕幡然起曰子道既畢臣節當盡乃赴闕補陝西副使飭兵潼關時予任陝臬長喜聞公至握手話生平甚懽公有仲叔嘉靖初任固原邊倉旅喪橐葬近地公乃選使齋俸金往覓遺骨備棺殮輿櫬歸葬祖塋為文以祭詞甚哀寮友咸感嘆予日見公直氣勁節越廿年無少挫折談兵籌邊雅負壯猷即慮公偉度軒豁議論慷慨後生莫諒也數勸分務謙抑遜出免觸時忌公斂容謝竟以事忤觀察被論歸子深惜之里居十餘載卜築名園嘯傲山水飲酒賦詩悠然自樂若忘其貴結同志為忘機社取古抱甕義期共登君子之堂不為世俗飲食宴樂云也所著有鳳里小稿存家笥公初娶孫安人中歲卒繼劉安人孫生二子俱夭折乃取三弟子垌為嗣教之即學膺詔貢於鄉歲乙亥命垌入仕授沙河尹過庭訓以節用愛民省刑薄稅垌奉命服官方二月而訃音驟至得壽七十二為萬歷三年十一月三日也垌卜萬歷五年四月十三日奉公合二安人葬於祖塋之麓以子與公篤專弟貢士址持狀屬余誌其墓子謂立人之道孝弟為先居官之常才識為最公克篤孝弟鄉黨稱焉顧才識之施惜時未究昔公之陝適邊報旁午子



叩公朔蒞事。公毅然嘆曰：今武備久弛，虜勢且猖，戰寡難勝，守散難支。昔歲虜酋請通貢市，總督翁公累請於朝未允。既復殺其來使，激虜忿恚，侵擾無時。今若容虜貢市，或可款虜脩備，惜時幾不可復矣。予味其言，尚未深信。比歲庚午，予自陝邊移督雲谷，目邊備狼藉，稽往牘見翁公議虜貢市疏草，凡三四上，詞甚忠懇，心切嘆服。竊計虜難服，無端以要貢，我不可以損威以徇虜。方飭兵勵戰，適虜酋俺答孫那吉來降，乃乘其索孫構獻，集逆勒令合親族盡河套諸部落，納款受封。歲通表貢如藩，且禮容與軍民互市，盡雲谷延寧甘肅山陝七鎮，莫敢復犯。當時朝議紛起，率謂旦夕不可恃。今且七載矣，每思太史公云：非常之原，眾人疑焉。及臻厥成，天下晏如也。向使公得專制諸邊，出所早見，運才識如昔者之言，其所表樹詎可量耶。歲乙亥，予入典京營，公作書頌余，猶幸前言之有徵。茲因公久要不忘之忠謨，予所深信，而惜施之未究也。是宜特書以昭隱德。垆娶劉氏，孫男三，以綱以欽以鉞，俱聘名家未娶。孫女四，長適李氏，三在室。誌得備書。銘曰：乾坤有正氣，海嶽毓精英。篤生偉丈夫，甲第馳令名。官程歷中外，雅操厲公忠。英標負壯猷，持節泚邊庭。表餌思和戎，時幾嘆未逢。嗟予誼同袍，契合天協恭。公歸卧東海，忘機效海翁。予久竿邊圖，格虜息邊烽。報主追



前脩久要慰生平頌言墨猶新清夢斷兩楹椿摧藹餘芳鳳去留遐聲馬鬣鬱  
崇崗千載勒芳銘

趙孝子傳

封邱何家琪

孝子姓趙氏名璧字立一萊陽人父文煇明嘉定州同知孝子廩膳生奉母居  
崇禎之季流寇蹂天下神京屢震我

大清間以偏師收於邊萊陽濱海尤戒嚴十六年癸未師薄城攻之不克去已

而復至乃陷方攻城頃孝子適與守禦事顧歸必請母避數請弗應及是涕泣

長跽於母曰兒讀書為諸生今日之難義不敢苟免免大人而後死母曰惡汝

讀書知義謂我老婦人獨惜死耶且我亦大明命婦也言未卒孝子舉首見兵

刃滿室起趨母前謂刃者曰乞殺我毋驚我母且詈刃者且喚孝子曰小子

毋多言是我萊陽趙氏母子報大明日也刃者復劫母踣斷一臂孝子捍衛愈

力刃交下已絕猶抱母不釋母並死初孝子家有空棺母指棺以孝子四歲兒

付乳母曰趙氏不可無後事急免以此果免母氏于何家琪曰家琪嘗恭讀

純廟所定勝朝殉節諸臣錄萊陽賜專謚者一人通謚且四五人何一邑忠義


之多也及考邑志類不詳志作于康熙中豈當時秉筆者猶不能無隱諱于其



間與至于癸未之難官屬以下死卅餘人列姓名而已且逸趙母子事夫歐陽之於五代稱良史獨無韓通傳後世疑之我朝如天之仁褒及前代為亘古未有而下方記載尚闕略如此嗚呼孝子諸生母命婦固無愧矣予追傳本末異日必有補而書之者

平谷縣知縣趙公自著歷履誌銘

歷履者何言自少至老經履之地所行之事也如以華言文之美行飾之行事另是一人文章另是一人則優孟而叔敖也豈真叔敖耶人為我狀且不可而况以我狀我焉可誣也以之示人且不可而况以之示吾子若孫豈可誣乎予幼為即解事大父常攜至瓜田嬉戲六七歲時大父口授以書尋至十一二舅氏僑居海豐某鎮招予從海豐茂才楊師遊不幾月而歸另從閩師魯山習業梵宇年十四家寒無貲借居大母侄曾氏宅尾一室四面無垣晝則扃戶入寺夜則同父而眠薪水時復告竭子母往來於邑南五里道上如織兼大母病瘵既向城市顧子又走鄉村侍姑誰謂荼苦母薺之矣厥學不成又辭閩師同一友人習靜於馬祖廟時鄉紳王公魯源學識頗高賦性伉烈人多憚之一日偶同大叅范公散步至廟見子呶唔不輟曰何故無師命一題曰學求如是而已





文期倚馬子援筆立就王師大異之曰亟從吾遊侍函丈者六閱月補弟子員  
第二試輒高等再歷六年食餼學官處館邑人田氏其月糧束脩用以娶兩弟  
婦嫁三妹不私妻孥一簪珥而田氏子年方十四郡試七藝居第一期取大物  
未久蚤世乃復館於李氏督李氏子弟遊泮者數人登科一人後辭歸課兒山  
房晝夜苦吟長兒際昌未冠入邑庠第一弟思謙亦入庠第一至妹丈兄弟姻  
甥輩在門下相繼環橋水者尚可屈指予接引一片真摯想今脉脉猶在人心  
也方三十後為長子次子婚嫁長女於銓部君及先考送終事完時年已五十  
業人生萬八千場矣平生無輕一字入公門無占人分文便宜與人不輕失色  
真有臨深履薄之意惟以孝弟忠信禮義廉恥自砥至五十七歲已酉膺里選  
在學四十餘年以行優舉者再試棘院者五偕長子試者二竟以博士終至萬  
歷壬子長兒際昌附予壻銓部君驥是年二兒病殞遺腹子生今名吾蕃相繼  
數年三兒婚次女嫁河曲公次子子乙卯選曹州司訓里中年荒食人長兒丙  
辰携家計偕予奉老母南行食指眾多俱抵曹以避大飢予在曹五年除本學  
公事外並不放債不囑託閉門靜坐戒僮僕不出大門時與諸生相過者共議  
論或遇州守公出代守看視惟恐事出不虞有累官箴偶一次遇強賊二十五



人用假勘合稱援遼把總討馬子見其氣色不逞飭衙門私自嚴備及二更果  
聲砲攻門時皂快並火夫人等聲木擂鼓持戈控弦有聲震天地之勢乃以有  
備遁逃前至清豐就擒予遭此變萬死一生有天幸焉予居曹寒氊一味清正  
各御史擢獎十二提薦二正薦一及轉平谷曹士大夫及青衿子郊欵且眾同  
寅有新城王公晤吾者曰公行矣吾失依歸彼儕小人沾私恩泣送者又不足  
道也自曹抵里契暑夾以風寒左臂痛甚已有懶向平谷道上意會遼陽事急  
地方缺官催檄如雨及抵任廣寧又陷廣寧逼近山海距都門僅六百里人情  
洶洶平谷斗大邑耳援兵並文武職官往來如梭夫馬供應不給又地狹民少  
歲派銀止六千兩俱馬頭夫役工食雜支之費並無起解京邊錢糧其四社四  
屯兵不足五千至流寓百姓每歲審派徭銀不足百兩上台過往轎擗夫取給  
於此民眼賄矣且除正項六千外飛差甚多如派遼東黑豆三千五百石脚價  
銀稱之熟鐵費二百兩麻楷灰萬斤申准二千修光廟陵寢驛車六輛雇價四  
百兩一時上司驟至如樞輔如本兵如制臺各道屬部廳供應極難措手大抵  
除應上司外不忍費百姓一文其薪米俱用市價亦無行頭料索又本縣幅帽  
褊小詞訟絕少時准一詞並不差人勾攝原告自拘一到自訊置罪贖俱無不



妄刑一人至本縣積獄事關母子兄弟大變無不剖決合宜仍有前任未完盜情數起俱為之申請開豁此外伸冤理滯如營州後屯指揮揚效忠物故其子加猷應襲舊令齊公停閣二年子細加查覆申道蒙允加猷始得襲職亦一快心事也他如上臺行移不便於民者子張胆議寢如制臺之蓋馬房太僕之兌馬費俱申准行本兵張公鳳皋駐月餘對道官曰此官鴉雀不驚撫基李公念塘曰此官淡泊守己平易近民正與地方相合豈虛語哉履任六閱月事無不辦民懷其惠且畏其威巡青及兵部等衙門獎二戶部薦一密雲管糧主政來公復兵部贊畫主政葉公震生太僕少卿林公熙春減刑評事魏公尚賢本道張公樸及各按君考皆註上上第因病乞休致諸上臺皆曰平谷縣小且疲虧他撫循一切事體無不妥帖奈何令之去慰留再四獨是兵興之際日夜交瘁較前病有加堅申前請部覆已准致仕而時方急規避之例遂奉旨削籍今已蒙恩復職蓋數數矣子年已七十矣有病與無病相半清明與昏昧相半心緒不佳懊恨虛生一場今已葛巾敝履優游田畝窮約終身謝世事而不營辭賓客而不樂惟日瞻老母一喜一懼惜祿養之事特缺終天之恨難釋可奈何子一生注意書籍頗有幾十種子孫未必能讀子妄為之希冀也子老矣在世日



短諸孫尚幼口授無日作紙上談文一冊集名家談文一冊抄張憲卿課兒行文一冊此小學之功也又選思訓篇內外篇三冊又撰族屬譜一篇墓田遠記一篇內外親譜一篇并予歷履誌銘一篇以遺後人予有號四初入庠號微升以白屋而博青衿也司訓號儒壇以位在諸生上也任平谷號馭黎以統治百姓也歸田號逸人以去任而道散也予自知不及管窺而為家傳迂言如是倘後日有善繼述者予九原之憂或可少釋乎銘曰嗟嘆此子兮何為莫知窮有所養兮達無所施敬而無斁兮方以自持時不逢世兮匪我如石聊以自誌兮其斯已矣

不孝孤等敬述而泣曰嗚呼此先君遺筆也誌成於甲子己閏六年所矣客歲告終始以授不孝孤等得而啓讀之蓋不勝其擗踊痛號而涕泗橫流也其示不孝等曰此誌以示爾輩子若孫耳不欲其傳也惟其止為家傳計故質而不文樸而未備於家世姻婭皆弗詳然而先君子生平歷履無不可令人知且臨終顯異合邑瞻禮邑乘國史是可以傳則誌銘體裁焉可不備敬涕泣而為之補蓋趙氏係出萊陽為別代開國伯開國子兄弟進士喬一諱植一諱格也又聞洪武初有一祖官留都治中中連坐法祖懼不免遣安人



携二子歸西徙抵霑化安人携次子居此不孝寒宗竟以安人作鼻祖也長子抵陵縣譜載次子德生景祥景祥生禮禮生淳淳生顯官永寧縣草場大使顯生璧永寧縣寄學諸生嗣改諱志志生松壽字仁甫生子五不孝祖其次諱養性字本善號善吾舉鄉耆生子三不孝先君其長也先君諱思睿字作之號四馭黎其一也先君生秉異姿賦有至性居鄉居官刻意砥礪大抵詳前誌中惟是履任平谷病勞交瘁歸田以後傷壯懷之莫展恨夙願之未酬膏肓不起竟以齋志長逝也嗚呼哀哉先君生於嘉靖三十四年乙卯八月二十日子時化於崇禎二年己巳十二月二十日卯時享壽七十有五家大母曾氏今九十五歲猶哭子配李氏為孤等母今七十二歲稱未亡人先君丈夫子三長不孝孤際昌萬歷壬子舉人娶李先明女次翼昌諸生娶諸生周世泰女蚤亡三運昌附例候選縣丞初娶大城縣主簿丁公汝璟子廩生丁懋良女繼娶李桂女今娶彭萬冬女女二一適萬曆癸丑進士承德郎吏部文選司主事丁鳴陞勅封宜人二適山西河曲縣知縣孫公瀛子諸生孫翼林孫男三吾麟聘蘇州府同知王公典孫廩生王丕振女際昌出吾蕃聘河間府同知吳公應軫曾孫諸生吳慊女翼昌出吾芳聘諸生丁啓昌女



運昌出孫女五際昌女一適廩生羅載惇蚤世翼昌女三一適故城縣知縣李公元忠侄諸生俊英一適萬曆己酉解元范公元棗子成德一許字諸生陳萬策子騰蛟蚤世運昌女一許四川左布政李公芳侄諸生李元宣子人英外孫男四廩生丁之箕趙宜人出餘孫門出外孫女一趙宜人出外曾孫女六羅門一李門三范門二將以崇禎三年二月二十二日厝於荒塋嗚呼哀哉不孝孤昏憤之餘猶憶先君於去年十二月朔三日即辟穀不食康健動作如常抵初五日置筵奉家大母同家慈呼諸子女於前曰予生平不作兒女子態楚囚相對更無味子數日不飲食想當回去抵晚曰生之有死如晝之必夜兒女輩留連能使晝不夜乎此夜難再得諸子女能飲者飲可食者食此永別之歡也即歌鳳凰臺一首又歌雲淡風輕一絕聲可中金石隨曰聲音無恙久不食筋力漸衰明朝六日為我設香案謝天地次謁家廟謝祖宗拜跪如禮即至東廂曰亟取茶來隨歌物如自得一絕又歌文丞相人生自古誰無死二語仍返內舍手草一箋送兩軸小畫於丁甥又曰十日爾母誕辰銓部君來予當拜別此一面後當作桃源後津矣試整杯酌候之及期相對含淚又歌天心水面一絕於十三日拜別家大母并家慈俱成禮訖



將草前諭孤曰啓子之際惟爾輩在不許婦女近前壞吾大事子終氣後閱  
數辰方舉哀勿蚤以驚吾心子終後有願面子者莫之止抵十九日屆夜曰  
吾久不飲食人如此想自不凡稍卧即呼孤曰亟煎薑茶茶至手飲二杯盤  
膝而坐正面西向無跛倚態連呼大母者再而飄然鶴馭矣正容在庭端坐  
三晝夜上自邑父母公學傅先生暨里中士大夫下及童叟無一不望顏色  
嗚呼異哉嗚呼先君真迹生平備在前志不孝不惟不能文亦何敢妄加丹  
黃以掩先君本色先君已自狀銘亦不敢別請止以跏坐遐舉縉紳中未經  
耳目孤學問淺陋不能為先君揄揚奇事幸邀惠於宏儒鉅筆賜以傳記詩  
文用光泉壤不孝孤勒之金石長歌瓊玖之章矣

不孝男際昌等泣述勒補上石

平谷令趙公跏化傳

吏部郎中  
遷化人丁鳴陛念源

翁精神奕奕年踰古稀而好學不倦動履康強蓋百年猶未艾也會己巳嘉平  
之月朔三日而辟穀越三日辭家廟又越五日而拜別太孺人并孺人又越三  
日冠帶肅坐命焚肩輿衣履自示終期不近婦女抵十九日之夜乃呼諸子至  
前囑以後事盤膝西向而脩然跏逝矣嗚呼此千古奇事也夫跏化一事攻浮



屠者間亦有之。翁生平不佞佛而屬纊乃與苦行者等豈非善報哉。一日翁伯子孝廉際昌等跛跣造余廬以傳見。委余束髮託翁門下。既辱翁壻之雅。復忝門墻之誼。知翁莫余若。余曷敢辭。大抵翁聰慧穎異。忠厚正直。生平砥礪列之自誌甚真。余小子曷足識其大者。第猶憶甲辰歲翁招余在齋頭時。領翁議論超超元著。若飢十日而食太牢焉。一經陶鑄便成名士。如翁伯弟思謙并余與孝廉公皆游洋第一。其他環橋水而歌鹿革者未可更僕。余偕孝廉公一時共筆硯者較讐文字。獨許可余兩人。己酉翁膺里選。壬子余與孝廉公連鑣共轡。與乙卯翁謁選主爵。除曹州司訓。抵任內督子外課士。戊午之役。曹得雋者五多名流。本道吳公移獎曰。造士起鳳騰蛟。庭訓蘭芳桂馥。非虛語也。嗣以薦轉平谷令。時值廣寧變棘。盡心拮据。為運糧脚。為荷戈主。他如斷疑案。銷積案。寢制臺馬房之檄。覆萬戶承襲之文。一一在人口碑。莫可殫述。撫臺李公念塘目之曰。淡泊守己。平易近民。正與地方相宜。因實錄云。翁一生歷履忠孝大節。詳翁自誌。讀之猶多鬱鬱不得意語。嗚呼。翁即艱於一第哉。已儼然百里侯矣。孝廉公文名海內。豈久屈人下者。不於其身於其後人。異日策名樹駿。暢公之所未發。則德門之流慶固未既也。翁諱思睿。字作之。別號四晚。號逸人。系出萊陽。占



籍霑化之城南五里所著有思訓等書十餘種藏於家

讀趙逸人跏化傳

江陰華亭人陳繼儒眉公

真經世者方能出世真出世者方能經世吾聞其語矣未見其人也頃讀平谷令趙公跏化傳而異之公諱思睿字作之為諸生號微升司訓曹州號儒壇拜薊州平谷令號馭黎晚年解縣印歸田號逸人享年七十五子三曰際昌曰奕昌曰運昌際昌登萬曆壬子榜文行烜赫海內所推為夢日先生者也公束髮受書風雨齋盞屏蕭寺古廟中呬唔不輟聲屢試高等餼於學宮里選明經公五十有七矣一振鐸於曹州出方畧以消倉卒之強寇再鳴琴於平谷儲兵餉以應驛騷之軍興已而解綬拂衣收綸罷釣居然儒者高蹈矣生平以孝弟忠信禮義廉恥有砥即以此教子教士教民不聞佞佛也而跏化從容雖白頭尊宿久向茆茨石室中坐破數十年蒲團煮過數十石折脚鑪飯豈能撒手自如公何修而得此哉客曰公貞確嚴潔味不甘口膺不帖席七十年如一日則滴水滴凍之苦行也子壻門生則道伴也發部擊蒙使北面負墻而請教者拔高等掇魏科則上堂說法也學署一氊斗大一邑則禪房律院也調御擴盜則魔軍也言動不苟聲實流聞則忍辱鎧精進幢也著述咏歌則阿含小品也此公



之所以談笑跏化如屈伸臂項而無難色也吾聞公己巳臘月朔言笑如恒時越三日而辟穀矣越五日置酒別太君并元配子女輩聲歌琅琅若金石矣三日肅列香几謝天地謝家廟矣越三日整衣冠端坐先焚肩輿次焚衣履預示死期矣十九日之外呼諸子受遺命全跏趺西向而逝矣嘻異哉余謂公深得儒者家法此正教非浮圖氏教也昔朱晦翁易箒時索紙筆作季子書次作黃勉齋書又命仲子代作范通守書塗竄二三字精明不亂邵康節寢疾曰吾欲巡化一遭與溫公橫渠伊川談笑訣別寫太平數行詩五更捐館此何曾掀奇捏怪作方外狡獪伎倆乎特以士大夫少諱老老諱死偶嬰末疾輒與兒女子握手涕洟乞靈於巫醫師以緩須臾之死其狀可憐而其言至醜鄙不可聽遂使王孫傑劉伶鍾陶柴桑王東皋白香山之自挽奇志共指為知命達生之高人而未若趙公之真正跏化者也經世出世游戲在手其朱晦翁邵堯夫之流耶若曰生平不佞佛而實學佛作家客猶未能深知趙公也余故表而出之以告具明眼人者

馭黎公贊

予讀馭黎公志傳而思古儒者之作用未嘗不可見於世也公負博雅之資蹈

臨川余元季相羅萬蒸文正



純實之節涉水流之運會而哀義服訓造次必於古昔所稱道彌往而風彌厲非耶以彼其材然僅以博士起家一振鐸於曹州再鳴琴於平谷遂善刃以止用不副其才為當世所歎顧其為司訓時教行於州之士衣冠言動望而知為公弟子間視州守篆出方畧緝強寇數十轉安危於眉睫之頃而不動聲色抑何不測也平谷斗大當東事之方殷供應百出公外給軍興而內修雍容之化無缺於事修廢振抑君子嘉氣義焉若是則公之效其能亦既宏矣昔周程朱陸之儒其施用於世有大與小然所至有以自見教化之事經濟備禦之概見其緒餘於世者皆智勇之士所袖手咋舌而未易措是無他故其體用之學誠粹於己也公抑其儔乎至臨終跏化來去從容公所自主於微密之際者殆不可知矣

白河君傳

封邱何家琪

白河君者前萊陽趙孝子璧之孤脫難於乳母者也為令多惠政以代輸逋賦特聞當是時白河遭明亂田野污萊民新集租缺供者累年矣大吏徵之急無以應君至喟然曰是我之責也於是舉囊中金盡償之民相與為堂祠君迨去有送至襄陽者初令濬濬界冀充濱河恒藪盜君承上命難之未嘗濫曰盜本



吾民也敢不慎諸河將決相勢疏導水少殺已而雨止城不沒三版眾恐乃顧神願以身贖民命患遂弭旱蝗如之天下之變未有不起於民之凋敝者也為州縣者遣送亟賦稅假公羨取或值蓄變廉上蠲豫徵之甚至已蠹坐民浦其不然者熟視其力君子之任職也苟心焉力有不計而卒以拯民至於舊至而屢彈嗚呼豈偶然哉君名以鐸字恒麓生明崇禎十三年以國朝康熙十一年拔貢生為夏津臨淄教諭旋遷令春秋六十有六後百數十年人猶白河其居云

恒麓公至誠感禱序

河南巡撫顧 沂直隸人

為吏難至為良吏則更難刑名錢穀趨辦於簿書期會間若此者能其官矣難乎其愛民也風雨調寒暑時因其便而節宣之若此者安其常矣難乎其禦變也溫良慈惠和易近人人羣相愛戴若此者德及人矣難乎其格天也粵稽史書稱循良者代不乏人若夫仁愛並包常變交濟天人協應卓然以良吏著聞者蓋戛戛乎難之余撫豫之次載奉 命督運道經浚一入疆口碑藉藉問其人則賢侯趙老父台者是及相晤言論丰采卓越不羣心竊異之會台省缺員詔取天下良吏一時各舉所知公則置之選首 入告者越三日意其着鞭去



未及西山張副憲過汴詢公狀云部議未果扼腕者久之因問曰公不去得無介意乎西山曰正異其殊不介意耳公不去固不介意假使公且去則其介意者正多矣余曰云何西山曰曩浚有三變而三不為災賴公三禱焉先是患水堤潰流決沿河百五村旦夕浮沈公單騎殺其勢析其流慶安瀾矣無何霖霖經旬滂沱無涯城門盡汪洋眾束手公禱於河神願以身代俄傾水退未溺一人今春蝗生為害甚熾僉憂之公曰吞蝗難事也撲蝗易耳率眾先馳風雨不輟埽清無遺嗣有接壤奔騰者飛止無定貽害無常公禱於蜡神立時南去席捲一空焉乃不意商羊既往肥蠶遙落旱魃之為虐實甚公不敢鞭雷公也詎曰焚炷已乎日夜齋沐禱於雷雨神不三日甘霖遂大沛油油者如故焉豈惟無傷歲且大熟夫當行取不果公之不幸也乃歷三變而三禱皆應公不幸實浚之幸也向使公且去孰與除禹甸之患孰與效姚相之為又孰與責桑林之事哉且公未嘗一日忘浚也使其去奔走長安遇吾鄉縉紳談及三變是時身立朝端既不得目覩又不獲手援意必憂從中來自朝至於日中昃殷然若已溺已飢之不遑寧處也則其介意者不既多乎余聞其言而慨然曰公之為吏如是哉此則愛民而不徒能其官者也禦變而不徒安其常者也格天而不



徒及乎人者也。舉人之所難者，曾不足為吏難；舉吏之所難者，曾足為良吏難乎。昔劉昆有二德，魯恭有三異，一時稱最。今三禱皆應，則是漢有劉江陵，魯中牟，今有趙黎陽也。由是上之天子，用以展其夙抱；今之愛民，即異日之宏濟蒼生也。今之禦變，即異日之挽回氣運也。今之格天，即異日之參贊元化，變理陰陽也。曾吏治之為公難乎哉。

康熙三十年相月穀日

贈中憲大夫府君歷履行實

吾家生天水郡，清白傳世。自城北鳳樓里老塋枝分，始祖霑葬城南底溝，相隔不二里。逵祖葬古城，午子向坐南朝北，有一道人改之，風氣甚厚。此乃發祥之地，邑之舊擬城也。自始祖至吾，又二十世，自雙進士祖至吾父十六世。景輝祖事蹟不可記憶矣。思曾祖諱可梁，號任齋，少年博古，舉業屈於時，生平樂善好施，終老巖穴，頗曉大義，積善之慶。或自此始，生四枝長男，諱有光，號耀寰，即隆之祖也。祖容貌清癯，氣薄力弱，不能奮志，下帷又不能躬耕，田畝遂與祖母史太孺人紡績為業。後受封鄉飲，大賓周旋中規，邑令稱之。後祖亡，祖母孀居十四年，自置郭家園田四頃。至今子若孫服先疇，如存栝棧，弗衰生二子一女，長



男諱士驥字卓午號黃澤即隆之父也生於萬曆十七年十月三十日丑時父  
生而魁梧方面豐下舞勺時聰穎不凡博聞強記習八股筆下有非秋墜露之  
妙拜族祖蓬玄為師一日大鴻臚宋公諱繼登號先之老尊親訪蓬玄祖至書  
館見吾父整襟危坐閱案頭文字心驚異焉乃與隆大父言曰親家公郎科第  
之才吾欲教誨與大兒琮作伴讀大父拜謝吾父遂與五河表舅居同塾晝同  
食夜同寢彼此呼名不稱號無異胞兄弟也宋公次男諱瑄號七卓表舅年十  
四三男諱玖號九青表舅年十二俱拜隆父函文下提誨者數年隆父年十七  
入泮拜宗師王宇海內名家取第五名前母王太恭人火山後人氏年二十餘  
病亡宋鴻臚公為左氏壻隆外祖姜公諱繼望號燮字亦為左氏壻二人聯襟  
也宋公元配左恭人係隆母姜太恭人姨母宋公又與隆大父善自作冰人向  
吾外祖言之作媒結秦晉好吾母遂過吾父之門七卓九青兩表舅至吾家拜  
見老母先稱表姊母呼姨弟之名而自居再稱師母母辭師母之名而不受各  
持其正庚申宗師梅之煥科考父取一等第三第一趙公諱肅第二宋公諱琮  
皆同榜折桂宋鴻臚公彼時任蘇松道父署中開絳帳辛酉父年三十三中三  
十三名書三房第三卷出益都令胡良機太老師之門同門董嗣謚本縣人王



國軸滕縣人張緒倫安邱人畢良圯平陰縣人劉開基鄒平人皆名下士五河  
表舅亦列鄉薦與吾父同窗同年甲子乙丑九青表舅年二十二聯捷去七卓  
表舅拔貢入成均父曰教授生徒而有效庶不愧為人師乎戊辰父年四十一  
祖病亡父丁外艱己巳父閉戶守制華之宋老尊親請父至家長男名瑀次男  
名瑾以二子拜父門下澄嵐宋業師長男名瑚次男名璉亦以二子拜父門下  
後瑚璉兄弟同科外有宋繼芳畢世周皆執經問字二胞叔諱士驊號洛午字  
黃池生而磊落不羈農圃醫卜雕鏤漁釣騎射刀劍無不通曉恨讀經書字字  
不入父嚴責之不聽無奈納監終身不仕祖母生一女隆之姑母也字西鄉孫  
氏生四子今存三孫務農後祖母亡姑母亦於是年亡辛未兄嶺年十四博青  
衿壬申避土寇亂携眷至膠西匡九如年伯假館授餐父舌耕一年州中名士  
張懋禧匡蘭馨張茂先皆來聽講後三人皆登甲榜癸酉回里隆年十四歲湯  
宗師科考得入泮自茲以往兩兒父教之學詩學禮習舉子業三五年不令出  
門戶父著述頗多詩有志喁集文有文起樓橐手纂春秋四傳行於世外有著  
作恨遭秦火悉成灰燼乙亥父年四十七母姜太恭人年四十一方治家勤儉  
兒女繞膝妯娌同居甚和不幸忽感產疾於二月十八日病亡遺二男二女瑩



燒無依崖。蔭兩兒真如失哺之子。賴長嫂劉孺人內執喪事。蔭於是年權宜迎  
婚。小祥後方成合。蚤禮。是年吾父娶張太恭人。丙子庶母丁太宜人生三弟。崙  
丁丑。父年四十九。成進士。書二房中二百八十名。出翰林院編修。楊廷麟。太老  
師之門。江西清江縣人。同門蔣鳴玉。江南金壇人。吳春枝。常州宜興人。曹溶。浙  
江秀水人。周壽明。湖廣蘄水人。包爾庚。江南上海人。胡夢泰。江南鉛山人。賈我  
年。山東定陶人。歐陽忞。湖廣潛江人。郝錦。江南六安人。徐敬時。江西上饒人。奚  
士龍。江南華亭人。趙昱。四川安縣人。何永清。陝西漢中。劉顯績。北直隸通州  
人。遲鑛。本縣人。皆錚錚有聲者。殿試三甲一百五十一名。大理寺觀政。戊寅。父  
授內府中書科。欽命出使大同。造葬已卯。分房北闈。取士十一人。葛宗亮。浙江  
嘉興人。何平。江南嘉定人。徐開元。江南崑山人。楊澈。北直宛平人。徐養元。北直  
順德人。崔瑗。北直薊州人。楊名世。北直新安人。沈長輔。北直阜平人。吳拔尤。北  
直安平人。劉啓淵。北直清豐人。吳稱奇。北直晉州人。皆名下士。庚辰。張太恭人  
生四弟。崇辛巳。祖母史太孺人年七十三。感寒症棄世。吉午。叔赴京報訃。音父  
奔喪還家。大孝榮親。勅封。並至壬午。胞兄崙年二十五。中七十八名。舉人。父蔭  
衣聞報喜而不寐。乃語崖。凡曰。他人倉廩萬石。家累千金。豈及崖八股之中。恍



聞鼓吹之音乎如此方是盡孝大兄方思計偕公車不幸二月初六日大兵至城陷失守億萬生靈盡遭兵刃萊邑為墟父年五十五城頭慘殉死別生離有聲無淚大兄赴京請恩卹特贈光祿寺少卿廩隆兩兒結貸出資邑令關公諱捷先夙儒也作四六來哭軸內云睢陽齒冷願題有道之碑顏氏舌存樂作汗督之誄稱其忠也人子難忘哉高密縣令門生何平備贖儀五十金白馬二匹遣子來祭奠此得力於門人者大胞妹閨姐癸未年十七已擇吉出閣字劉生棟恨城陷死於刃下二胞妹安姐癸未年十二逃出即紹祚甥之母也丁庶母逃難出城住馮家泊三月初四日生五弟對遺腹子也今五十餘歲有子有孫矣隆思吾父從前之歷履恐人沿世遠子孫不得而知我一八旬老人詳悉而記之以付宗子子必善藏之自茲以往諸兒諸侄諸孫以及重孫悉知悉見無用我如數家珍矣不孝隆謹誌

天啓辛酉科本縣同榜舉人

宋琮

金壇知縣行取編修

左懋泰

吏部員外郎

董嗣樸

山西

董嗣謙

按察司使

趙肅

未仕

荀如桂

太平縣知縣

孫謙

戶部郎中

崇禎丁丑科本縣同榜進士



張允捷

刑部員外郎

遲鏞

行人司

李岩

河南副使

周伯達

蘇松巡撫

光祿寺卿贈奉直大夫趙公府君行實

先世自太平興國居東牟之昌陽始祖兆域卜城北鳳棲里金熙宗時五世祖

諱植發解與弟諱格同登皇統丙寅進士官於朝賜紫金魚袋封開國伯開國

子坊額甲第開先時稱天水郡趙氏云十八世伯祖文燿明嘉靖辛丑登第官

兵備副使自茲宗支繁衍科甲蟬聯明經秀士累代弗絕焉高祖諱景輝譜系

十七世自鳳棲里遷於城南之古城為夜臺曾祖諱可梁樂善好施常以禮折

人有彥方之直里人歎為長者積善之家及其子孫始基之祥居多祖諱有光

習儒業誠樸持重能卑以自牧封中翰受七品殆猶後此之榮也溯吾始祖至

吾父二十世矣吾父字卓午號黃澤生而魁梧屹然玉立幼即穎悟見書籍輒

喜居恒整襟不妄動亦不妄語成童時具大人之度其天性使然也十七遊於

庠文辭爛然可觀六經盡曉大義大鴻臚宋公先之先生一見奇之語大父曰

此汝家千里駒非獨能學體貌恒迥異也遂拜宋公函文下與舅氏宋宗玉偕

筆硯呈玉文玉兩舅列門牆受業焉從此隨鴻臚公遊會稽浮江淮十年在外

閱名山大川文章亦益進洎辛酉父年三十三登賢書與宗玉舅同榜聲名藉



甚乙丑文玉舅以受業聯捷戊辰大父亡父未偕公車辛未甲戌屢困不第奮  
志下帷不窺園者十三年日日鉛槧古史博稽羣書手纂春秋四傳刻行於世  
如先秦兩漢唐宋八大家十三經十九子一展閱間即選抄成帙教崖隆披誦  
過庭融融泊如也丙子崙生丁丑父年四十九成進士出機部楊太老師之門  
同門皆海內大儒當時誦書二房紙為之貴戊寅任中翰判事之暇讀文獻通  
考日必二十葉大學衍義復加丹黃吾父之攻苦弗輟也已卯北闈分房得十  
一人皆名下士庚辰出使宣雲給假回里奉養祖母日教兒輩抄通鑑成誦真  
以經史為寶田也是年崇生吾父平日作八股約千百篇刻文起樓橐問世僅  
六七十首以少為貴也棄八股後詩律漸細焉恨遭兵燹著述悉被秦火惜哉  
寒門清白百畝僅足供饘粥不治產業依然寒素門風仲叔諱士驛號洛午廩  
監生吾父飲食教誨同居共爨至今五十年未析其篤於手足如此辛巳父丁  
祖母艱哀毀虞殯無不中禮壬午父值讀禮時崖賦鹿鳴父且喜且悲悲慈闈  
未及見而喜讀書之有效學之有益豈徒然哉癸未春痛父慘殉邑難雖死猶  
生而煢煢諸孤思音容而存手澤血淚枯矣即褒贈光祿卿崇祀鄉賢哀哀  
父母徒拜明禋耳是年崙生歲壬辰崖捷南宮崖拔貢入監甲午崙中副車丁酉



戊戌聯捷與叔諱鑰者同受知於田沛蒼夫子家門漸有起色父之膏腴雖未  
得其萬一而弓裘未墜其所培植者深矣癸巳嶺任萬年令藩辛丑泚武義命  
壬寅崙任瓊山令由督撫首薦擢祠部郎辛酉承乏督江南學政崇壬子拔貢  
對郡庠食餼頗工揣摩迄今子孫繩繩一堂五世溯其發祥鳳樓者其地也開  
先者其人也綿綿瓜瓞式穀貽謀不亦厚乎茲恭紀吾父行實以為家乘非敢  
溢美自為闡揚述其大畧仰求諸大夫君子年冢石交賜金玉之篇摘琳琅之  
句或傳或詩無論近體古體援筆推敲惠付以垂貞珉拜有道之碑華袞榮矣  
捧汗督之誅什襲藏之心弗忍忘感曷能已

男 嶺崙崇對 謹述

贈光祿卿卓午趙公傳

光祿公諱士驥萊陽人始祖植與弟格同登金熙宗時進士累仕植封開國伯  
格封開國子天水郡趙氏奕奕東年間矣入明名文耀者以進士官兵備副使  
於植為十四世孫自是簪組蟬聯甲第相望蔚為華胄累傳至景輝為公曾祖  
可梁為公祖咸以積善好施稱里中父有光始修儒業以公貴封中書舍人詩  
書之澤發祥有自久而克昌公生魁梧嶷然岳立年十七補博士弟子員受知



於鄉先輩鴻臚宋君繼登留與子琮同研席其季理致受業焉時宋氏以制藝  
名一家公雖鼓篋從遊而文章典碩宏雅出其上已偕鴻臚浮江淮探會稽禹  
穴名山大川之氣畢見於文不待辛酉登賢書傳誦已遍海內矣丁丑捷南宮  
出清江楊機部夫子門釋褐官中書得留都下與師友相切劘明制中書為閒  
曹供繕寫誥軸外無他職逍遙朝請引領臺諫而已公獨不然取大學衍義文  
獻通考於所僦土舍中琅琅誦之日課熟二十葉然後冠帶出通賓客其志務  
深析治亂之源博稽前代制度為天子興治平不使人誦儒者為無用之學已  
卯分房北闈所舉者皆名彥庚辰奉使宣雲隨乞假歸里奉太母溫清以孝聞  
友愛仲弟士驊數十年同居共爨無間言旋丁大母艱哀毀盡禮里黨稱之癸  
未方擬入朝候截俸考選值萊陽被兵城陷公死之巡按御史據實以聞褒贈  
光祿卿祀鄉賢生不得大顯於時沒而被其榮可哀也已嗚呼百六既邁天地  
將崩圯之際雖有智士才人未易言支拄然必身當事任無可譟諉義與城存  
亡耳若公以里居家食無城社之責萊又濱海邑山谷所在僻阻苟潔身遁迹  
自免於難誰起而議之者乃卒堅坐城中與少司空攻同殉節師友淵源毫髮  
不爽豈不烈烈丈夫哉當公之讀書稽古其所成就早定於胸中故生死當前



毅然不少動也公有子五人原進士萬年命擢拔貢生武義命崙進士由瓊山  
命擢祠部郎今為江南提學僉事以清廉薦崇拔貢生對廩膳生天所以報公  
者繩繩未有艾也公之先自宋太平興國中累世皆卜葬鳳棲里其後始遷迄  
今踰七百年而振翮鳴休德輝彌遠謂非地靈兆之與

槁里曹溶撰

字容水號秋岳崇禎丁丑科進士  
浙江秀水縣人

贈光祿卿趙公墓表

今上御極之元年明史成頒布中外其列傳中特表明季死事諸臣而萊陽贈  
光祿卿趙公載在傳中按公崇禎辛巳以內艱居里癸未國兵薄城紳士分  
守公在東南隅無何北城陷家人奔告請速避公勃然叱去曰吾與此城共存  
亡義不獨生即奮身撞城下以殉事聞得光祿之褒是時邑人仰公大節咸欲  
為易名之舉議有端緒未幾國變事寢閣且百年及為興朝所著錄見公名登  
史冊炳耀寰區乃相與懽忻鼓舞羣奉忠毅為謚而尊崇之志以抒公諱士驥  
字卓午號黃澤生而端凝天性孝友及長博通經傳中天啓辛酉鄉試崇禎丁  
丑成進士出清江楊文正公廷麟之門文正公嘗語門下士曰讀書務實學方  
今以濟用為急願與諸君勉之公既授中書職務清簡暇則取大學衍義文獻



通考諸書於所僦土舍中朗朗誦之日課熟二十葉然後冠帶出通賓客其志務深析治亂之源博稽前代制度為天子興治平不使誚儒者為無用之學乃雲中造葬北闈同考又二年以憂歸而城陷矣公所蘊未獲一試而遽以身殞惜哉然論士必先節義而後勳名厥後文正公以義師留贛城陷赴清水塘自剄嗟乎師弟子後先相望如出一人以是知二公之自矢有素前之相砥礪為有用之學者特其餘也今既定謚號將立豐碑於墓側公世系行誼文學之詳已具前人誌傳文序中而後人慕思無窮又欲有以表於墓而乃以其詞屬余顧余文何足以重公史論不云乎士大夫家居者無封疆民社之責而慷慨捐軀自遂其志此其英風義烈固不泯沒於宇宙間矣然則後之讀史傳者想見公之為人光氣炳炳猶生豈不足以副士大夫之希慕而大慰其子孫是為表

乾隆十二年歲次丁卯孟秋後學鞠濂撰

忠毅者里人謚也乾隆四十一年欽定勝朝殉節諸臣錄凡明季死事者咸賜謚號如吾邑左羅石先生則謚忠貞宋九青先生則謚忠節而宋嘉甫先生則與我太高祖均謚節愍固皆可與日月爭光矣獨惜我太高祖之胞弟諱士驎與國兵巷戰手刃數人身被數創中暗箭而死我太高祖之堂弟諱士驥公與妻姜氏同時投繯我太高祖之長女年十七死於刃下此其忠節與諸公同而邑誌不載朝典不及何不幸與故筆之家乘使世世子孫知所景慕焉

辛彤誌



張太恭人行狀

嗚呼痛哉。吾母太恭人之棄不孝崇等而長逝也。不孝崇等罪大孽重禍延先慈。呼天搶地。曷其有極。痛念吾母素康強無恙。迨垂白猶善飯數年。來雖偶染痰症。秋冬間作。春則已飲食復常。不孝崇等私心自喜。竊謂吾母享期頤未艾也。奈歷年遭遇不幸。洵庚辰正月仲凡又復棄世。吾母遂以痛子之故。神昏食減。淚承雙睫。日不休奄奄。至於莫可支。嗚呼痛哉。昊天降割。懼此鞠凶。不孝心裂。肝摧。生不如死。夫復何言。顧念吾母清操苦節。幾六十年。若祇以昏瞶無文。泯沒莫著。則不孝崇等之罪。死有餘痛。爰匍伏苦中。追思先母閭範灑淚和墨。畧述之。其他隱衷苦志。即罄竹濡毫而莫殫也。先母張姓。邑望族。先外祖諱志舉。庠生。諱容。莊公子也。有名諸生中。篤志好學。至髦不輟。生二子三女。吾母其季也。大舅諱允陞。其家譜作允拊。附生。次舅諱允發。附生。皆一時譽望。外祖每厚期之。而尤鍾愛吾母。蓋吾母少嫻內則。寡言笑。勤於女紅。端肅而有度。外祖嘗顧兩舅謂吾母曰。兒輩即不克顯。吾閭至他日。大門楣者。其此女乎。年十八。歸先大夫。先大母史太孺人。顧之而色喜。謂婦嚴正而慎默。異時必貴。先大母待子媳頗莊飭。吾母善事之。雞初鳴。即盥漱櫛笄。被適大母所。及所授巾視。



膳先意承志惟所欲是以最得大母歡心當是時先大夫雖已薦賢能書而家世清白蕭然數椽而已先大母拮据艱難構置西莊良田百餘畝時而鄉居吾母則暫主中饋親井臼時遣婢僕提壺漿甘膳菜羹之物日奉不缺蓋其溫良純孝天性使然以故長兄嶺仲兄隆暨兩嫂諸子悉愛之如己出一門雍睦無纖芥之嫌丙子先三兄崙生雖出之庶母丁太宜人而先母鞠育之倍常維時先大母喜滋甚先大夫苦志芸窗數薦南宮不利吾母篝燈佐讀以家貧落勤紡績至夜分不倦丁丑先大夫成進士家道漸興而吾母處之若固有和姻戚御下以寬毫無榮華態里人以是稱之戊寅先大夫授內府中書科迎先大母至都吾母隨焉庚辰吾母奉先大母頤養於家曲體備至先大母每寄慰先大夫曰有婦若此子第勤爾職勿我望念也是歲不孝崇生先大母輒然色喜時恭遇覃恩封先大母為太孺人封先母為孺人辛巳先大母感寒症吾母日夜侍湯藥衣不解帶率兩凡內外預後事附於身必誠必信旬日病劇不起計音達都門先大夫倉皇失措慟哭孤里問及衣衾含殮等事一一悉無憾乃垂泣曰子為孝婦吾亦少減罪矣壬午長兄嶺舉於鄉先大夫蓆衣中悲喜交集吾母亦慟念先大母不能待幾失聲癸未長兄方思計偕公車乃大兵旋臨遂有二



月六日之變嗚呼痛哉當是時城已陷先大夫顧吾母曰吾雖非大臣然身受國恩有死而已子其善撫諸藐孤吾母泣下沾襟謂先大夫曰死則俱死耳死忠死節一也先大夫不顧徑登城殉城下時吾母已偕丁庶母至觀音庵待命亡何老仆驚報得凶音吾母乃謂丁庶母曰此其時矣各引繩繫梁就之少頃中斷仆地久之且蘇各愕問奚未死又久之乃嘆息曰其或者為茲趙氏孤兒命不合死勿強也吾寧為其難者越日兵稍退乃收拾幼女孤兒得相聚率兩兄扶父柩歸河東良好泊隨即詔長兄前曰爾父死難雖自靖然不可沒爰命赴京請恩卹特贈光祿寺少卿而吾母心始帖然共謀大襄安厝之如禮乃以灰燼之餘從十指中經營結構整理之遷徙西莊三月初四日不孝對生吾母與丁庶母居漏濕中共哺乳焉險阻艱辛可謂備嘗之矣嗚呼痛哉當兵燹之後廬舍邱墟家業蕩折無少遺舉室搖搖如在風箏兩兄雖成立實煢煢落魄無所質維茲幼孤或八歲或四五歲吾母撫育之飲冰茹蘖荼苦萬狀吾母姜太恭人尚遺二女長十七傷刃次十二女則依慈母為命母則依弱女慰情前已許字於高後數年出閣雖兩兄為之經理而妝奩絲縷瑣屑等物且不惜脫簪珥佐其費吾母蓋素識大義者也不孝總角時過庭即畫荻教以義方及成



童倬就外傳、延師厚禮之、每和凡助誦讀、燈火達丙夜、兒輩自諸生以至居官、悉賴母訓、庶幾無負厥職、是以世人多以歐陽賢母呼之、壬辰長兄登春榜、吾母躍然喜曰、吾乃不鬱鬱米甕中度日矣、未幾丁酉戊戌、三兄又復聯捷去、壬寅仲凡且以拔貢出宰武義、一時之人皆謂吾母矢志柏舟、苦心所致、天報於是乎不爽、是時也、諸子成立、門閭稍更大、用漸寬、進以華美、衣不服強之、則怫然作色、嘗謂不孝曰、衣以蔽體、何取乎麗爾、具遠志、爾誌之、福不可不惜也、矧吾少寡、以未亡人而被服文繡、更不宜、是以居常服練裙、經年衣履不敝、盡不更為、雖授寵褒、後猶歛然自視、絕無侈靡心、至於執家棟也、日用飲食、克勤克儉、率婢子、督女工、不使惰、亦不費、度所入支以為出、或醬肉膳羞之物、延賓則豐、自用必有節、其淡泊寧靜、有如此者、壬子、不孝崇拔入成均、吾母雖欣喜而、又諭不孝曰、丈夫有志、爾勿以此滿爾、尚期克承前烈、不孝不才、每追念至此、五內崩裂、神昏氣喪、尚忍言哉、癸丑、長兄棄世、哭之過傷、幾致病、嗚呼、先父之歿也、晝哭、先長兄之喪也、則晝夜哭、故君子以為合於禮、而吾母動作儀則、各準於矩、凡一切無少愆、洵有古敬姜遺風焉、越數年、先三兄官稍顯、祿漸厚、而吾母亦復安常處順、汰奢而不之過、至丁卯、不孝落魄、屢試不售、無奈選司鐸、



吾母愛子心盛命不孝及早強仕不孝重於違命勉出當即迎養吾母至署署中僦居陝隘及年餘吾母思歸復送回至丙子科以鄉試之便給假省親見吾母康健如故私心甚慰乃不數日遽罹亡婦之變吾母痛苦非常時長女雖已出閣遺幼女甫數歲遺一子甫三歲命不孝曰幼女吾為懷袖幼子撫去為汝伴吾尚強健勿我念也方促不孝回而吾母乃以痛媳之故日夜抑鬱至次年二月感成疾不孝聞信奔至一見握手痛哭曰吾何病因汝亡婦柩停吾觸目心傷耳汝能勉力俾就淺土吾心安吾病已矣不孝承命數日內拮据粗就權厝於吾父之墓側吾母病果日愈又復促不孝去比年來懸切欲歸而又復諄諭止之竊幸一堂之上子孫繁衍歷五世每問安繞膝下充屋且盈戶外問則領應而已讀書之子則勵之曰其務勤修勿墜爾祖爾父業以是為天倫至樂即富貴榮華皆不逾此嗣後維天弗恤遭家不造死別生離顛沛奇變真有不忍言者矣而吾母乃以遲暮之年屢遭慘禍痛何以堪因是抑鬱結胸痰症為崇然不犯則猶能步履也丙子夏先三兄嫂柩至親扶哭之慟幾絕是歲叨綸綍以子貴誥封太恭人吾母悲哭中稍開顏焉至庚辰正月吾仲兄忽得不起症恐母知徧囑童僕諱言未幾二十七日捐館舍伏枕悲痛水漿不入口



者累日蓋吾母於諸兒中尤愛先仲兄以故形容漸枯槁痰益盛不孝崇聞之心驚胆落已決意轉文告歸矣適值歲大計不准九月家人至報疾又會有公務事方峻遂戴星匍匐抵里至則執手嗚咽囑遺後言而已越數日忽以家政悉付長嫂區畫之延至十月二十二日竟溘然逝矣嗚呼痛哉彌留之頃神色從容總無一語及於亂但命子媳速著我命服吾將逝斯時也然且問及不孝崇等飯否哀哉助勞之恩昊天罔極不孝生不能盡一日之養仰答萬一今日者徒撫柩櫬而心傷無益矣言念及此不孝崇等尚何視息人間哉嗚呼先母生平敦倫好義樂善不倦子必姪鬢齡失恃時善撫之愛孫不啻子而又好佛事每晨早起焚香持尼珠口誦居家好生戒殺下而老媪幼婦皆發慈悲願樂施舍喜事必從凡臧獲或恃愛犯過止諭之以理箠楚焉則不忍是則先母之名節清操仁慈保惠卓卓在人意表者姑舉其梗概如此嗚呼痛哉先母生於萬歷四十六年八月初二日子時卒於康熙三十九年十月二十二日未時享壽八十有三男五長嶺壬辰進士江西饒州府萬年縣知縣元娶邑庠生劉公諱伯瑄女繼娶蓬萊郡廩生陳公諱堯言女次隆壬辰拔貢浙江金華府武義縣知縣娶邑庠生王公諱誕祐女俱前母姜太恭人出次崙戊戌進士歷任翰林



院提督四譯館太常寺少卿娶高公諱中極女庶母丁太宜人出俱先先母卒  
次即不孝崇壬子拔貢樂安縣教諭元娶歲貢生臨清州訓導唐公諱文麗女  
繼娶即墨壬戌進士湖廣道監察御史黃公諱宗昌孫女拔貢生浙江浦江縣  
知縣黃公諱坦女先母張太恭人出次不孝對歲貢生候選訓導娶邑庠生左  
公諱瑄女庶母丁太宜人出女二長適邑庠生高公諱嗣宗男邑庠生高擘前  
母姜太恭人出次字庚辰進士行人司行人王公諱丕修男歲貢生王翰先母  
張太恭人出幼辛孫男十四長子連國學生娶歲貢生候選知縣孫公諱嵩女  
次子溶國學士娶戊子舉人孫公諱牧伯女次子洙國學生候選州同元娶癸  
卯舉人成山衛教授孫公諱熙女繼娶邑庠生劉公諱咸女繼娶邑庠生王公  
諱士勗女次子汶郡增生娶甲午舉人單縣教諭高公諱璇女早卒俱隆出次  
子泌為吾母承重孫國學生候選縣丞娶大嵩衛乙未進士兵部督捕右侍郎  
李公諱贊元女次子濟邑庠生元娶河南浙川縣知縣李公諱佐孫女歲貢生  
候選訓導李公諱藥女繼娶招遠丙戌舉人河南柏縣知縣王公諱京女俱康  
出次子泗歲貢生候選訓導元娶大嵩衛乙未進士山西河津縣知縣馬公諱  
光遠女繼娶甯海國學生楊公諱旭女繼先母卒崙出次子滑邑增生娶丁酉




舉人大嵩衛教授姜公諱玉英女早卒。嶺出次子滂。歲貢生。候選中行評博娶  
 棲霞國學生。候選州同年公諱邦彥女。崙出次子涓。邑廩生。娶歲貢生。候選訓  
 導高公諱璉女。嶺出次子灃。娶邑廩生李公諱秀女。次子溟。娶甲辰進士直隸  
 肅寧縣知縣孫公諱元亨孫女。國學生孫公諱宗爽女。次子沆。聘邑庠生左公  
 諱密女。俱對出。次子羨。幼未聘。崇出孫女十四。長適蓬萊乙卯解元河南項城  
 縣知縣李公諱元善孫。陝西咸陽縣知縣李公諱嶺子。邑庠生李伯。嶺出次適  
 膠州拔貢生考授知縣匡公諱隆子。國學生匡元恭。隆出次適四川叙州府同  
 知高公諱理子。邑庠生高仁昌。嶺出次適郡庠生李公諱日輝子。邑庠生李圻  
 隆出次適棲霞戊辰進士巡撫保定等處都察院右副都御史郝公諱晉孫。丙  
 戌舉人郝公諱續子。國學生郝續祖。嶺出次適丙戌進士禮部尚書沙公諱澄  
 子。候補上林院監丞沙汝澧。次適己亥進士候補中書科姜公諱炤子。國學生  
 姜允域。俱崙出。次適丁丑進士行人司行人遲公諱鏞孫。歲貢生沂水縣訓導  
 遲公諱桓璽子。遲欲瑄。嶺出次適乙丑進士工部侍郎宋公諱致孫。戊午舉人  
 候選知縣宋公諱據子。邑庠生宋惟棟。崇出次適郡庠生張公諱福徵子。邑庠  
 生張重英。次適丙子舉人湖廣鄖陽府推官殉難贈僉使孫公諱揚聲孫雲南



鶴慶府知府孫公諱公復子歲貢生孫鑑次適江南長州縣知縣周公諱仲達  
孫甲子解元候補內閣中書周公諱世球子庠生周撰俱對出次字福建長樂  
縣知縣張公諱允齒孫郡廩生張公諱鉤子張沐次幼未字俱崇出曾孫二十  
四長菁庚午副貢生娶歲貢候選訓導李公諱槃孫女李公諱如綺女子連出  
次芷邑增生娶國學生劉公諱薄孫女早卒子溶出次莊邑庠生娶江西興安  
縣知縣宋公諱衡孫女邑增生宋公諱惟模女子洙出次蓁娶己丑進士上林  
苑監丞劉公諱琬孫女邑庠生劉公諱公喬女子連出次芄娶郡增生宋公諱  
惟榮女子洙出為子汶後次萼郡庠生娶御前侍衛周公諱世祐孫女戊辰進  
士福建浦城縣知縣周公諱正女次蕪娶蓬萊丙戌進士翰林院編修歷任江  
南鳳宿兵備道副使王公諱一驥孫女國學生候選州同王公諱政永女早卒  
俱子泌出次蓁元娶御前侍衛周公諱世祐孫女拔貢生周公諱上女繼娶棲  
霞邑庠生林公諱允恭女子溶出次蔚邑庠生娶歲貢生候選訓導宋公諱惟  
棊女子泌出次英聘邑庠生劉公諱在茲女子連出次蔚未聘子泌出次繫聘  
邑庠生姜公諱允愷女次嘉未聘俱子連出次荃未聘子渭出次茲未聘子滂  
出次華未聘子泗出次荇未聘子濟出次蕙未聘子連出次萇未聘子澐出次



葉聘子濟出次衡未聘子澆出次葵未聘子灑出次著未聘子泗出次敦未聘子灃出曾孫女  
 十八人長適邑廩生宋公諱惟荼子郡庠生宋泗子溶出次適壬辰進士左春  
 坊左中允歷任河南汝南道張公諱瑞徵孫恩貢生東昌府教授張公諱重紹  
 子郡廩生張學敷子泌出次適河南閩鄉縣知縣耿公諱文蔚子衛廩生耿仙  
 子連出次適江西興安縣知縣宋公諱衡孫邑增生宋公諱惟模子宋煒子溶  
 出次字福山庚戌進士四川道監察御史鹿公諱廷瑛孫太學生鹿公諱永鑑  
 子鹿善裕子泗出次未字子濟出次字邑庠生周公諱治子周大儒子渭出次  
 字大嵩衛乙未進士兵部督捕右侍郎李公諱贊元孫歲貢生李公諱本灃子  
 李業子澆出次字邑庠生張公諱澆子張璉貞子渭出次未字子濟出次字姜  
 公諱允執子姜墩子連出次未字子洙出次字招遠邑庠生劉生諱宏任子劉  
 元子濟出次字郡庠生張公諱淵子張秘子澆出次未字子泗出次字孫公諱  
 緝祖子孫居仁子湄出次未字子澆出元孫十九長起桂娶國學生張公諱岳  
 女次起樟未聘俱菁出次起梅聘邑庠生郭公諱世瓏女芷出次起楨未聘菁  
 出次起林聘孫公諱鑛女莊出次起梅聘辛未進士江西安遠縣知縣高公諱  
 胆孫女郡廩生高公諱汝棟女萼出次起梧聘李公諱廷忠女慕出次起櫛未





聘並出次起松未聘芄出次起檀未聘芄出次起杰未聘次起榘未聘俱端出  
次起棕未聘芄出次起麓未聘端出次起樞未聘莊出次起榿未聘芄出次起  
榿未聘莊出次起樞未聘藻出次起槐未聘芄出元孫女七長適戊辰進士福  
建蒲城縣知縣周正孫國學生周星賁子周貞一菁出次未字芄出次未字菁  
出次未字芄出次未字藻出次未字芄出次未字菁出嗚呼今卜四十年九月  
十三日就窆於馬山之陽與先大夫合葬焉不孝崇等在昏惑中追憶先母行  
實厓畧詮述如右詞特卑陋語少倫次倘有可採伏冀 當代大人先生哀而  
賜之名用光泉臺不孝崇等死且不朽

孤哀子趙崇泣血謹述

### 丁太宜人行狀

不孝<sup>崙</sup>遭家不造罹茲鞠凶昊天降割禍延慈闈實不孝罪孽深重所致嗚呼  
痛哉寢苦枕中泣血摧肝實不欲生真不如從吾母於地下又何能搦管為  
文然先太宜人懿行使泯沒不傳則愈重吾不孝也謹杖淚而述之先生母太  
宜人丁氏生於甯海之汪水村舅氏為牟平舊族太宜人年十九執巾櫛於先  
大夫性溫和祇肅重儀止無惰容族里戚黨見而重之咸曰天眷有德必先子



以可受之地而降命焉。今者趙氏之祚其在丁之器宇間矣。當是時嫡母姜太  
宜人方即世。先大夫詢於人言。嘉太宜人有令德。欲命以閭政。兄嫂皆推之太  
宜人堅辭不受。命曰。夫子深於春秋大義。豈以人之譽言是家。有家婦足以襄  
事。余何敢當也。越明年丙子。遂生崙。是年張太宜人來歸。太宜人事之如禮。又  
明年无大夫成進士。授秩中翰。家世固貧。居官無所益。太宜人甘辛自喻。日兢  
兢撫崙是務。他弗計。兩兄嫂重太宜人之賢也。時以資所不逮。嗟嗟母氏劬勞  
而崙之勞我母氏者。多人所不經。乃天不之恤。及癸未。先大夫忽見背。崙甫八  
齡。同母弟對。則生於先大夫見背之次。月嫡母張太宜人生。崇弟亦甫四歲。雖  
長兄已薦賢書。仲兄饒文譽竭力奉我兩母。而世貧之家。益以兵燹。藐茲諸孤。  
其以累我孀母者。悉數之不能盡。悲哉。太宜人嘗語崙曰。吾有生汝來。履諸艱  
備矣。然固命也。甘心安之。願兄嫂之德不可忘。幸汝長大能讀父書。倘隨兩兄  
後。博一第以慰先靈。吾又何憾。壬辰。長兄捷南宮。越六年崙亦以先大夫之澤  
流及。擣散不施。錘鑿承器。取登戊戌榜。歸見兩母喜且泣。嫡母謂吾母曰。人言  
汝大貴。當生佳兒。今果然矣。對曰。微嫡母之德不及此。崙既成進士。太宜人益  
謙退自如。無矜色。馭下以寬。人相見與處。貧時同癸卯。崙分符得粵東之瓊山。



以為邑雖僻遠褊小亦百里侯封也薄祿足奉兩母庶其釋此藜藿乎嫡母以瓊山遠在六千里外崇弟歸試之不易不願之任請於吾母則曰奉養之義嫡母先焉既不獲請義不可獨伸於余矣念我昔者初奉箕帚於趙氏夫子屬我以中閨而我不敢承亟請繼嫡我事之越七年而天降喪亂禍我夫子我以汝曹故相從嫡母為未亡人家之壁立艱為甚未嘗廢晨夕之儀以有今日幸使汝得展祿養於瓊山嫡先而我從之舒色笑甚適也乃不審汝之請而留焉而我獨偕焉當官舍燕罷時回思環堵中有嫡母在而謂我安瓊山乎予行矣我其與嫡母共晨夕矣苟汝以我之志不忝於瓊山三年吾兒為良吏猶愈於奉甘旨也顧為婦高氏曰汝事吾素謹吾以為佳婦今滋以往其以事姑者佐夫無忘趙氏舊德其為我大光寵備用是遵母訓日恐獲戾於瓊山無以對吾母苟幸無罪歷二年遷儀部為請兩母就養京邸嫡母又謂吾母曰京邸非瓊山比吾不能離崇而居與之俱多口是累汝其從之勿使為傷心於有母之不奉苟再遷焉吾當無辭官養耳吾母於是始同至京署登郡有梁生者以負欠故子婦被質去至京師梁生屈於勢不得還汝而來白吾母聞其辭之悲也呼為問狀曰是負欠者無所控坐觀者不敢言聽其終焉而已乎力能援人於危而



不之恤非天生利達者所忍膜視况惻隱人所同動焉吾家素貧今幸有祿米之餘舍此安施君子不忍於人而思濟之豈必計家之有無乎苟梁之子若婦不堪於質而有他故雖欲濟之亦無及矣而吾能安於心乎吾與爾婦簪珥在焉佐以部署之俸不足則白之同人庶以濟事崙謹如母命按節求之梁生子婦乃得還族兄秋濤春汪兩孝廉癸未歿於兵其子不能計朝夕暴骨者三十年及崙典試閩中反命至歷下疾作告歸病間吾母顧崙而歎問何歎曰汝道路之餘在囊橐者幾何汝族兄之不葬吾痛心者久會無所逢耳今汝以病歸北道之資猶可徐計何不出囊之餘一為謀卜乎命崙婦出所餘得三十金呼厥子使襄大事曰吾不忍吾宗之有不薦體黃壤者也吾母居常儉約服布素身膺寵褒終不易紡績逸手足崙所上贈幣常却不御曰吾非欲自苦也是吾家本業所以致天休者不敢忘也又曰富貴非我所可逞也處富貴而不有則所謂立富貴之命耳嗚呼不孝崙筮仕來十三年僅一奉母於京邸母也惡豐就畜盡物不可又以不得時奉嫡母周旋先歸即令乞假里中所得於承歡者一息強病之日也其何當於晨昏以為吾母春秋方富崙即勞勞仕籍報劉亦復有日詎意忽染寒疾終不孝崙等飲恨罔極哉天也天之賜不孝以疾也使




不孝依依膝下而不知愛日念吾母苦節三十三年遭逢不言撫不孝等以至  
於今不孝崙未盡忘一日追述往蹟觸事傷隱不孝崙等所痛心疾首不得一  
死以從者惟冀 仁人君子哀而賜之華衾光泉壤以稍追不孝崙等罪戾之  
萬一也 誥封先太宜人丁氏生於萬曆四十五年七月二十五日未時卒於  
康熙十四年六月二十九日子時享年五十九歲今卜十月十八日就窆於馬  
山準與先大夫合葬焉生男二首生即不孝崙戊戌進士候補禮部主事娶高  
氏萬曆戊戌進士歷任按察使司按察使高公諱出伯孫女庠生高公諱中亟  
次女次生崙登州府學增廣生娶萬曆癸卯舉人涿州知州左公諱之似曾孫  
女邑廩生左公諱懋廉孫女邑庠生左公諱瑄長女孫男四長子泗業儒聘乙  
未進士山西河津縣知縣馬公諱光遠女子涉幼聘廣東道監察御史鞠公諱  
珣女俱崙出子瀚子沈幼未聘俱崙出孫女三長字丙戌進士禮部尚書沙公  
諱澄長男候補京職官生沙汝灃次子己亥進士直隸雞澤縣知縣姜公諱焯  
長男庠生姜允域俱崙出三幼未字崇出不孝崙之長兄壬辰進士江西萬年  
縣知縣嵐仲兄壬辰拔貢浙江武義縣知縣蔭季弟壬子拔貢崇皆嫡子故其  
子若孫不詳書也



先叔太高祖贈廣東瓊山縣知縣洛午公事畧

不孝孤哀子趙崑泣血稽顙謹述

先叔太高祖諱士驊字洛午號黃池我七世祖耀寰公之仲子我太高祖節愍公之胞弟也由廩生援例入國學以姪貴賜贈文林郎廣東瓊山縣知縣娶王氏贈孺人生二子長諱崗號石城邑廩生次諱嶷棄儒為沙門弟子其楊氏所生二子曰全曰立之居甯海者則幾至失迷焉辛卯今年五十矣猶憶過庭時先君子往往語及景龍伯事爾時不知景龍伯何人也問之先君子曰居吾語汝昔吾聞諸祖父嘗言洛午公幼聰慧讀書數行下初搦管即卓然可觀父兄皆以遠大期之然性磊落好禱劇凡絲竹音律農圃醫卜篆刻漁釣無不精熟而弓馬刀劍尤所耽嗜以故入庠食餼後不專心帖括而鄉試屢不售丁卯丁外艱哀毀如制服闋援例入北闈又報罷遂決意不復思進取節愍公愛其才謂之曰天下無難事患不為弗患不能也與弟約多讀多看多做三年無成兄也憐其咎於是嚴督之一如幼習章句時洛午公不堪其苦欲廢焉而無由會壬申土寇亂舉家徙膠東遂借端隻身之甯海焉甯海五台村有楊翁者富而好客年老無子止一女二元未字意欲招贅而難其人適洛午公曰暮假宿翁





奇其言貌善下之留與食客伍每日飲酒賦詩講刀論劍翁嘆為全才食客等  
以公曾詭言斷絃遂撮合贅諸其家越年餘舉一子名全楊孺人曰君前程遠  
大倘獲寸進妾亦與榮施宜速行勿為妾一人誤大事公遂指腹命名焉而歸  
及至家甚稱楊翁盛德而入贅一事絕不掛齒蓋恐節愍公之督責故諱莫如  
深也丁丑節愍公成進士授中翰洛午公理家務課子姪讀書暇則習夙好與  
少時交游較優絀辛巳丁內艱成服後遣叔弟吉午赴京報訃節愍公聞信星  
夜馳回一切喪葬如禮壬午伯侄眉魯中式聞報始而喜繼而羨既而悔且恨  
勃勃然思欲為馮婦節愍曰失之東隅收之桑榆亡羊補牢未為晚也詎意天  
命不佑方期取大物而忽有次年二月初六日之變次年二月初六日大兵破  
城節愍公以身殉洛午公曰吾生平以嗜好誤功名習武多年未經一試今可  
施吾所學矣於是手持長槍腰挾雙刀與大兵戰於東馬路往來衝撞如入  
無人之境大兵死傷無數不意猝中暗箭業已踣地而大兵猶畏其起也剝  
左肩而去嗚呼人患不得死所耳若洛午公與節愍公者兄先弟後與城終始  
可謂死得其所矣是亦可以無憾先是洛午公自甯海回越數月楊孺人復舉  
一子名立至癸未之變楊孺人偵公殉難信投繯者再皆以人救不死啓目見



二子抱泣失聲，翻然曰：死也易守也難，吾試為其難者以撫茲藐諸孤。既而雙親並沒，嗣兄持家，嫂氏驕悍，因絜二子徙居他所，紡績度生。如是者幾四十年。一日顧家人而歎曰：吾為趙氏婦，終不知夫家門何向，亦屬笑談。爰携一子，一孫至萊陽，鬻祖母張太恭人，與楊孺人為娣。以年相若，節相若，艱苦又相若，不覺一見甚相得，叵耐上自石城祖夫婦，下及奴仆，臧獲輩無不輕賤其母子。且時相嘲嗟，以為樂。楊孺人恚曰：吾非有求於爾者，吾有子有孫，當不至填溝壑。遂辭去，不復通音問矣。後聞楊孺人卒，子孫落窳，輾轉流離，與雁戶等。至汝景龍伯之父，始無衣食憂，苟非楊孺人回家一次，汝景龍伯繼之，誰復知甯海有骨肉者？小子識之。他日有人增修譜牒，務令補入，慎勿遺漏也。丙子辛彤讀書京邸，我序堂兄言之鑿鑿，與先君子所言如出一口。而楊孺人之聲音笑貌，我序堂兄更舉素所聞諸老祖母者，口寫而手狀之，故予今修譜，遵吾先君子與序堂兄之命，詳為纂入，並誌之以示永久焉。

侄六世孫辛彤誌

趙將軍旌序

公世儒家子也，大父起家進士，父亦以制科著。少好讀書，已去學劍習虎豹韜。

左懋第



畧諸書年十九即以策謁薊遼梁大司馬司馬收置幕下會遼左虜警司馬遣  
事遼陽李大將軍將軍又奇之已而大將軍斬虜首千級公與有功以材官奏  
捷神宗皇帝時天下無事惟念虜李將軍善戰多功皇帝茂之寵賚將軍而  
授公登州衛鎮撫賜衣一襲饌一案銀酒器一具亦異數也已任薊鎮冷口關  
提調再任白羊城守備居無何又改舊興守皆以勤廉知名夫他地余未至舅  
氏陳將軍築城冷口余省過之一墻外皆沙漠俯城堞下瞰降虜嗷嗷索飲食  
絡繹其間中有流石壘石當之可憑而過也余心悲中國制虜無長策啾然而  
嘆今天下少威大將軍防禦忘死生多戰勝又孰如李大將軍薊遼間安若無  
事恐不可制粵十年餘遂決裂令人深想兩大將軍而冷口諸地亦安常獲勤  
廉如公者哉已又任保定松棚路都司再任河間瀋陽營遊擊將軍未幾以失  
投刺貴人罷去遂不肯復出噫公為人恂雅不似武人詩所謂溫其如玉者也  
太史公傳李廣悛悛口不能道辭死之日知不知皆盡哀識者以為善論將公  
為將二十年家居至不能備車馬亦安之公豈武人哉夫人任姓出色名族性  
淑恬公廉於官愛士卒孝友克著皆其相也公束髮為將三十餘年歸里又三  
十餘年相繼卒淡泊勤劬如一日信公偶也余生也晚先大夫倦遊歸與公作



社飲公又與余叔有子女好公之子紫水為叔氏壻余與紫水交文章之知過於親戚每讀其制藝如紫海生瀾名士風流不可概見公故艱於子而有如是子行跡邁王父公為將之將獲不已奢哉邑將旌公與公夫人噫是可旌也

周太孺人墓誌銘

候選州同知年家眷世弟張學慎頓首撰文

癸酉舉人雲南雲南府易門縣知縣表兄張鈞頓首書丹

鄉飲介賓眷弟荆惟峻頓首篆蓋

吾邑歲進士紫瞻趙公淑配曰周南澳總戎麟圖公之次女也先是公任登州

遊戎意在占籍萊陽紫瞻太翁恒麓先生官大任令以紫瞻缺室為請聘於

周周重趙氏高門諾之遂成朱陳好康熙辛未親迎於濬署一堂喜氣人人稱


賀三日廟見先生顧之開顏曰此婦他日定能有作用然寧勿顯其才乃卜吾

家無憂患耳官邸五年奉侍維謹天倫雍雍怡然樂也先生旋里哭遭張太夫

人之喪孺人倉皇失措日夜號泣此憂患所自始然外有紫瞻總理其事孺人

但佐之於內猶未為大難甲申夏紫瞻遺危疾遽至不起孺人一慟幾絕願從

地下顧念上有衰翁誰其事之下有幼孤誰其育之遂乃忍淚強顏勉作未亡





人當此際也為乾坤何等時哉艱辛憔悴孺人於是真值其難矣然其大甚者尚不僅此乙酉先生以痛子之故抑鬱成疾孺人親奉湯藥以婦代子乃醫不奏效遽捐賓客孺人呼號垂泣曰天乎奪我夫又奪我翁我何以自立藐諸孤何以圖存酷烈之遭蒼萃於此不更難哉同堂伯叔勸慰經營喪葬仍毫無遺憾然而天猶未悔禍也數年治家數年教子數年捍災禦侮方期仰報夫子而甲辰五月仲子復妖此則難之難者孺人素曉大義不以喪子故悲過從前然痛切於心烏能已已雖嘗移居北山栽樹種粟間作消遣奈血淚交枯精神漸減丙辰戊午連年病作庚申病益劇延及六月倏厭簪珥臨終時諸子請遺命惟以兄弟和好存心忍耐為言諸子領之而逝今年辛酉十月其子芳樹等葬孺人於郝家莊之原與紫瞻合祔因揖余而言曰我兩姓三世交好知我父者知我母墓門之石君其為我銘之余固辭不獲勉力操觚即以所知孺人者誌孺人統計孺人一生為其難不為其易安樂之時少憂患之時多然罹一變則有一應變之智勇憂患愈深則幹濟愈出節孝卓卓久蒙憲皇帝溫綸綽楔其間非孺人曷克當此先生昔云此婦定能有作用其言何不幸而中乎孺人善秉家政不辭勞怨正氣凜凜未許干以私而天性諄篤與



人寧厚無薄待庶子無異己出始終五十年心事若揭他若愛骨肉周族黨濟  
貧窮恤僕婢皆相因而並及至若兄弟之急者女兄之適霍者尤皆特沐深仁  
有加無已也今大歸有期諸子成立家道駸駸盛趙氏門閥依然不改繼往開  
來謂非孺人之力與或者不察以謂孺人操行太嚴過矣孺人生於康熙壬子  
七月十三日未時卒於乾隆庚申六月二十四日亥時子五長蔭樹庶出候選  
縣丞娶同邑候選州同知周公諱輔長女孺人出者四華樹候選縣丞未聘早  
卒芳樹太學生娶棲霞太學生牟公諱竹長女茂樹早殤未聘荃樹太學生娶  
太興康熙辛丑狀元鎮守廣東高雷廉等處總兵官霍公諱維胤孫女太學生  
諱煜公長女孫男三大勳荃出聘廣西鎮安府知府楊公諱恢基孫女現任登  
寧場鹽課大使諱緝祖公女次功勳芳出次立勳荃出俱未聘孫女三長末字  
次字登寧場鹽課大使楊緝祖長男培仁俱荃出次末字蔭出

銘曰識既真守更定矢柏舟金石並值運迤力能勝饜卒瘞蔭子姓荷表  
閭巍煥映及同穴稱正命嗚呼乃如之人洵不愧巾幗之鬚眉允可稱女中之  
賢聖



明孝廉曾祖夢日公補傳

嗚呼悲哉我曾祖以明萬曆壬子薦賢書至崇禎癸未八月卒於京邸明年甲申二月倉皇歸葬閩月而有李闖之變明社遂亡余竊痛祖之壯志長材不獲表見後世又鮮能推原始末而深悉其所用心也憶不肖四五歲時余祖仁菴公口授章句稱述先德今猶記憶一二祖之言曰余父孝廉公趙姓諱際昌字獻宇號夢日一號海日則三水文光祿題贈也大父諱養性鄉耆父諱思睿起家明經歷任平谷大尹余父豐體偉軀銳上無鬚鬢目炯炯口如懸河慷慨有大節敦尚氣誼孝友於家交遊遍海內豪傑其大概有若此者余家自平谷公始以讀書成名余父弱冠入學與妹婿丁念源先生同受庭訓同鄉舉次年先生成進士歷任銓君而余父十上南宮終不第平谷公司訓曹州余父往侍與同門生文行切劘歲大飢招族中寡人就食而活者甚眾陞任平谷佐贊畫仁恕廉平孚於上下七閱月而從父歸養又三年平谷公端坐善逝余父乞言於海內巨公如天如維斗彝仲子艾陳章羅諸先生哀輯詩文彙刻跼化集行世大母百歲壽終余父以承重讀禮葬祭之暇西走陵縣認始祖析居之支東抵萊陽辨始祖自出之派創修合譜世系乃明又掘視祖墳查明世諱立石墓前



更其衣冠以葬為曾太君建石坊於門為平谷公建石坊於墓刻趙氏世系及  
眉公先生趙逸人傳又各立一碑生平好學雖老不倦偕友人習靜山中遠應  
吳門復社手輯五經講義於易春秋尤多發明或勸之仕則謝曰吾未登甲科  
不忍半途廢也蓋吾之祖告不肖者如是余竊謂故明神宗之季上下不交光  
宗則逆奄擅權禍熾東林莊烈則當國大臣門戶水火士大夫各樹私人而無  
能出其身為國家用於是朝廷懲咽廢食敝履科甲而終之以倚任官寺雜進  
他途我祖以許國壯志經世長材每思出所蓄積一吐甲科之奇以洗甲科之  
辱而又守義安命不肯有所夤緣依附以自進其身夫是故歷年五十而終以  
孝廉死也豈徒區區焉一甲科之為重而賫志以没乎哉曾祖配李孺人妾王  
氏皆無出撫季弟仲子為嗣余祖十六歲稱孤赴京師扶柩歸里匆匆營葬以  
故曾祖之德行文學未及叙次不肖幼奉祖訓長讀曾祖書謹據口述撮其大  
概俾子孫有所矜式倘遇海內大君子尚友有心闡幽表微將異世之知己猶  
且感德於地下也

雍正己酉

曾孫恒祚謹述

吳縣知縣贈文林郎佐日公行誼







爽然守吾業者嶺也。今卓午沒已三十年，而長公又沒，予能不悲哉！今年九月，將合葬於元配劉孺人之墓。其子子泌具行狀請予為誌，予何忍辭！長公名嶺，字長公，號眉魯，父諱士驥。前丁丑進士，中書科中書舍人。卓午其字也。長公十二能文，十四補博士弟子員，十八居母喪，哀恪盡禮。二十五薦賢書，踰年城陷，卓午殉難。長公以罔極之慘，疾首飲泣，忽忽不知身世事，苦身勵志，為次弟先於諸弱弟撫之教之，尤憚心力。三十五成進士，甲午筮仕，得饒州之萬年縣。萬年土瘠民疲，賦多積逋。長公至，凡不便於民者悉除之，舊例新令至，修葺衙費，分派隸下。長公曰：吾民疲甚，恤之不暇，何供給為！又有風波米相沿為官所私，民至轉輸倍額。長公辭不受，立敬莊二社，日集多士講論德藝，雖勞不倦。退而語人曰：吾當困於簿書時，一接書生相與辨難，則煩躁頓釋。耳戊戌得叔公捷書，長公喜曰：吾性不樂華廡，拙於仕途，徒以食口之艱，勉為從事。今吾其可以自逸矣！未幾以催科不中額罷歸之日，民遮道呼曰：是不忍吾儕之疲，追呼不及坐，是以去者也。夫不得罪於百姓，其終於仕亦可以無憾也已。長公勞於吏且八載，歸里後又以萬年逋欠責令賠償田產，既盡僅而獲免。由是抑鬱疾作，卒以不起。初長公赴府應童子試，途次新店偶入廁，見遺金，長公守以待良久。



一人倉皇至問之則蓬萊里長張學前醉失稅金遂出囊與之癸未夏偶如邑西  
鄙忽有人阻道曰此吾馬也失三日矣竟持馬去居日餘其人至萊州得盜人  
因匍匐來謝長公亦不與較其天性和易惠介又如此生平尤耽於詩雖遊宦  
久未嘗廢學問其遊歷所至山川風物得失悲歡之餘同人謙會之際往往見  
之於詩及歸田里貧約自甘益肆力於詩書聞來予萬柳山莊出所為詩以相  
質其篤篤之誠猶如稚幼時予心嘗以子身後事期之長公孰為倏忽之間化  
為古人而予又執筆而銘其墓可歎也長公之卒也距其生得年五十有六元  
配劉孺人先長公卒子四人長子泌劉孺人出次子濟次子涓側室蕭氏出次  
子涓繼配陳孺人出女四人孫男女若干人銘曰生也父期之底於成沒也  
師誌之永其名嗚呼斯為趙子之生平

萊陽趙母劉孺人墓誌銘

余恂

子同年萊陽趙公眉魯以名進士令江右之萬年八載政且成會以催科不中  
額謫官未去任而聞其配劉孺人之喪以其賢也悼之甚且自為狀疏其行事  
而請銘於子曰痛哉吾妻之遽亡也吾妻幼而孤育於吾家事吾父母甚順以  
為婦而兼為女也吾兄弟姊妹六人吾長焉若仲若叔之娶若妹之嫁皆吾妻



為之拮据經畫而俾有家室也以為嫂而兼為母也吾為諸生吾妻篝燈紡績以佐吾讀吾為令吾妻茹蔬服澣以佐吾廉也以為妻而兼為友也前後為吾置妾者三焉喜妾之生子如其子痛妾之殤女如其女也以為嫡而兼為姑姊妹也吾在治所踰年而吾妻始至未踰年而吾妻已歸也歸而吾適謝事方欣欣然如釋重負旦晚欲歸田園如彭澤之身耕於前而妻鋤於後也天乎何奪吾妻之速也吾蓋聞其言而深嘉之夫萊陽趙氏為山左望族公之父光祿公克勤王事勲在社稷公既起家為賢令而次第次公今浙之武義三弟叔公令粵之瓊山一時兢爽極門第之盛人或稱公父子兄弟之間怡愉雍睦以承天庥而不知孺人所以輯和於內者其助實多也今世風俗流弊孝友不講骨肉相齟此豈盡人之無良哉勃谿反唇謠詠申詈牝晨狐媚以馴致實沈閼伯之釁者有矣以視孺人何賢不肖之相懸也孺人既沒而家之人上自兄弟妯娌下逮婢妾臧獲無不為之雨泣即此以觀孺人之賢豈不諒哉然亦知公刑于之德矣孺人姓劉氏生於丙辰五月二十八日午時卒於順治十八年辛丑閏七月初三日戌時享年四十六歲男二長趙子溶次趙子涵女三銘曰中憫其身章縫其行禴翟其容縞綦其性以字以長以莫不令我銘其幽彤管



斯映

曾祖萬年縣知縣眉魯公行誼

曾祖諱原字眉魯號長公忠毅公五丈夫子公居長當忠毅公殉難時年二十有六前一年擢鄉科弟隆亦成立餘皆幼大難修乘家徒壁立兄弟兩人伏處數椽之中勤撫視供饗殮事繼母張太恭人庶母丁太宜人無間言鄉黨間有孝友之譽公為人醇篤恬靜厚於倫紀薄於榮利自寒素以至登第服官初終如一日也釋服後晦迹勤學為諸弟先壬辰始應春官試遂成進士筮仕得饒州之萬年萬年地瘠民疲賦多積逋至則捐苛費除積蠹興學校蒞任八年而萬之疲民以蘇顧獨以困於簿書為苦嘗曰吾生平不樂華膺厭繁劇退然知所不足徒以諸弟室宇之不立從而仕既歷年所曾無毫髮補已而丁酉戊戌太常公捷音至則喜曰責可分任吾將返故廬以適吾性無何以拙催科掛冠歸歸而閉戶食貧不預外事間與二三老友歌詠性情怡然自得也顧以江右逋欠責之前任賠累且千金東西支吾甫完所責而氣血耗痰疾作矣卒年五十有六所著有寔堂詩稿存於家元配封孺人劉氏生子子必繼配陳氏生子子湄側室蕭氏生子濟子渭葬於古城舊阡

曾孫起檀誌



萬年縣知縣眉魯趙公去思碑序

眉魯趙侯治萬年政有成而以課賦不中額力請去其君子傍徨於庭曰失我明師其小人躑躅於野曰誰我慈母于是合謀而請於余曰蕞爾邑僻在一隅不能借侯叩九閭公稔知侯之所以治萬年者蓋為一言誌去思余哀病山居不能越境謁侯接音響通情愫若夫播在輿頌則爾萬年有歌使節矯行應發粟清風攜盡不須錢者非侯之急蠲賑乎有歌迺逢廉吏車抱頭任屏陲者非侯之懲奸蠹乎有歌止戈成火武雞犬靜桑麻者非侯之却防兵乎有歌平反息飛霜疑讞速甘雨者非侯之理冤抑乎有歌胸藏范甲真寒胆頸繫終纆早勒燕者非侯之練鄉勇而嚴固圉乎其小人俯而應曰誠哉我侯有歌宮塔惟許諸生入桃李平分二社中者非文既敝而侯為之興乎有歌巋然廟貌是斯觀賴有關西楊伯起者非學宮既毀而侯為之創乎有歌烏公自鎮河陽絕少遺珍嘆九淵者非格例有限而侯為之增請舉額乎其君子俯而應曰哉我侯凡若此皆創舉也而行之於今日之萬年為最難余觀今之為令者惟督賦之是急上以是責下下以是應上非是則無以稱職而副功令無論



代即下至漢唐渤海朝歌清河蒲亭諸公雅化一切視為迂遠而不合於時宜嗟夫功令豈專以戕民哉侯承萬年積逋之後勞心焦思八年於茲至不難以身受過而為民請命固非尋常急功名之士苟且以塞當官而不顧所懷來者迺其建樹又彰彰如是即今爾小人得以寬其手足而安於耕鑿君子一其心志而安於絃誦者何莫非侯養之教之功而不知侯之所以自處者豈弟本自天衷廉靖由於家訓凜冰蘖之守居凋劫之鄉有琴自理無鶴可携憶昔寇警登陴鈴鐸之聲接乎鄰境侯偕弟次公閭仙吟和不輟余有次韻香焚子夜明如日薰茹公餘凜似霜此則侯之所以去萬年君子小人不知而侯又畏人知之者其繫人去思何能已矣宜爾躑躅傍徨共灑攀車之涕云

年家治生葉應震頓首拜撰

武義縣知縣秦器趙公自著事畧

趙子自武義歸今且七年所矣一日乘暇疏其行實付諸子使藏之既又授冊長子漣使文之以待他日之狀漣等謝不敢當趙子笑曰萬古一浮漚耳彭何壽顏何夔達人固均視之何傷乎子讀陶靖節書彼為文以自祭為誌以自銘千秋之哲人韻士也謂爾父不如乎且親有美必謹書之亦人子責也何狀之避



而不為乎且我已卜兆域自作壽藏此日之事實即他日之行狀也文之而善使吾觀之而樂焉又奚不萬年也於是連等不敢辭越數日抱冊來余披讀之其詞曰以大人之命小子何敢辭雖然以管窺天何當於萬一也惟大人其正之今如大人命書於左

吾趙氏世居昌陽邑北八里許鳳棲里吾五世祖開國伯兆域也自金熙宗以來至今科目未歇葛藟之庇蓋五百年如一日也十四世祖諱江由鳳棲里再卜城南古城達祖景輝祖可梁祖咸昭穆安侑焉吾曾祖封中翰耀寰公暨史太孺人體魄俱降於此是地回龍相傳邑之舊挺城今為吾一門佳城云大父黃澤府君以前丁丑進士起家中秘文名洋溢海內慕名節者至於今不衰大父生五男或甲第或恩拔或秀士俱不失青箱澤有後弗棄基其謂是與吾父諱蔭字次公號泰器生於天啓之庚申與伯父為同胞皆出於姜自幼聰慧書過目輒成誦年甫象勺詩文音律皆精先生長者咸器之年十四遊膠庠試輒高等稱知名士年十六吾母王孺人來歸乙亥大母姜太宜人病故丙子子連生是時張太宜人歸吾大父為繼室吾父與母事之一如所生壬午伯父鄉薦癸未城有變吾父項後受傷得不死痛大父慘殉哀毀骨立同伯父理喪事皆



如禮赴闕請卹典獲贈光祿寺少卿是年父二十四母年二十六父身被數創  
吾母日夜炊藥餌治刀瘡重以大父含殮艱難勞瘁亦難為情矣乙酉子浴生  
時方避難東山吾母卧車上乳哺戊子子沐生父僻居牛口母自為撫養慈母  
之恩報有難盡者數年來矻矻寒窗延師以教諸叔張祖母丁庶母同居夥食  
居處飲食皆吾父母躬自拮据里人聞之稱孝友大父孝廉十八年讀中祕書  
無多日止遺良好泊一莊伯父耕焉餘有石田苗草相竊吾父同諸叔棄之大  
父修文後原無家器即有一二盞釜吾母悉讓長嫂耕讀牛口與諸叔同居吾  
母恒以諸兒之糗糒食之而吾父亦以舌耕助燈火諸叔泣手澤之存奮厥志  
益重吾父焉壬辰伯父成進士辛卯吾父恩拔丁酉朝考取第一出己丑會元  
左虞孫先生之門戊戌三叔連捷癸巳子汶生辛丑謁選得金華之武義邑地  
少山多士樸民頑父催科中寓撫字流民復還立聲應社士風丕振特立儒圖  
不得與齊民伍武義東四十里名茭道驛為東甌孔道偏僻之師迂路入縣蹂  
躪不堪父申請上憲禁止枉道永刻碑帖民無雞犬驚焉至剪道蠹懲縣舞文  
吏完人婚娶與夫賑飢民恤寒士有已刻熟水紀畧可考武林名士選紀畧重  
刻大觀僉稱風流邑宰也吾母語吾父曰君任三載輕刑薄斂好客禮士又好



快諧能面折人過但聽君強項之言不受上頤指牧豎之禍將在君矣願君勿復出口甲辰三月十九日忽有暴客入署持短兵見兩人戎衣若叛卒者吾父捺刀刃賊額母出呼援洙兒赤身刺賊賊逃走旁一賊奪父刀傷吾父面衙內有健仆斫盜胸盜帶血踰牆去乙巳府廳以外盜聞奈同城武弁誣捏內盜撫軍執此被論仍別使捏款令請托則已否則大不便父笑曰吾無黃頭郎嚴道郭況金穴焉能辨此遂解任羈縻金華七年手纂通鑿手抄史記輯詩槩一部重訂先大夫春秋四傳作四書齋月講義十九子與離騷皆手抄選誦三唐詩古詩紀皆有繕本八體音律更寢食以之矣己酉父走浙之新城有舊同寅亦至意若望其大有造補此庫務者乃月餘無所得窘甚父惻然曰是地豈吾壘斷乎何得以私利薄交情乃盡出其新城之囊約百金助之庚戌父同洙兒走淮上見一人守死媪江邊大哭父遣洙兒問之曰死者吾母也中途求半橐不得何以家為父憐其梵獨命以四兩贈之壬子秋三叔典試入閩反棹嚴州見吾父旅寓江樓曰兄之蹟踈而不歸者是吾責也出千金記算簿書始得脫然共覓舟而回父還家計出外十八年見石城叔第四子下拜訝其纍纍然偉丈夫細訊之知為伯侄四立吾父出門時此子方四五歲父母俱亡吾母憐其無



依育之如己子。今已畢婚矣。於是父感吾母之德而更喜。尚叔之不孤。父歸里數年。香山白社賦詩聯句。閒居閉戶。猶如金華著述。有孫七人。日口授尚書課。讀五經教諸兒。待人接物。擇交馭下。過庭繞膝。則談上世老人事。或宣先世格言。令人解頤。論及八股。復取先輩文選擇。使明理路。機到即有操觚。較先輩更勝一日。遊瀛海。遇故友。困於途。即解單衣服之。又贈以酒資。其人感謝去。父母生平行事。未可殫述。今父命兒輩大畧言之。兒輩故叩下執筆而載之。如此惟大人其正之焉。

太常寺少卿閻仙趙公墓表

男子連等敬述

太常趙公諱崙字叔公。別號閻仙。為昌陽望族。其太翁先生諱士驥。號黃澤。由前丁丑進士。授內府中書舍人。崇禎間。與包長明陳大樽諸君子。同以文章名海內。癸未殉難。迄今邑人稱其忠烈。為無忝所學云。中翰公生五子。公行三中。翰公盡節時。公始八齡。苦志好學。試輒冠其儔輩。年十三。補博士弟子員。事親孝。兄弟睦。居心正。處事寬。和不宿言諾。不縈利欲。伉爽直朴。有古君子風。與子以文字成。知交寢食與俱。名雖異姓。同胞無以過之。甲午。公年十九。中副車。丁酉。戊戌。聯捷成進士。壬寅筮仕。得粵東之瓊山令。瓊多豪猾。賦稅累欠。無算前



令不能治。公下車經營撫字，擇其尤悍者重懲之，人皆樂輸，恐後不歲餘而數年之積逋全清。以特薦擢儀曹，已酉權稅淮關，商人不困於途，貨財胥吏罔敢干以私。壬子典閩中試，極意搜羅，時稱得人。壬戌督金陵學政，力絕竿牘，務取真才。一時童子老牖下者，悉入黌宮，所拔皆知名士。其後聯翩登第者，指不勝屈。江左文風從此大盛。士人以為公慎廉明，為南國所未有。還朝日，多士相率送之，往往皆感歎泣下。香煙絡繹數百里不絕。至今碑樹道左，祠立江干。十四郡之生童，猶稱頌不衰。丁卯冬，總憲少保于公疏其事於朝。上嘉嘆久之，親書公名屏上。戊辰補福建興泉分藩，未之官。特旨留為光祿少卿，轉通政。左右叅議再擢太常少卿，提督譯館，實心任職，官無廢事。聖天子心識其能，將大用公矣。己巳會東撫錢珏被逮，謫戍遼左，慷慨就道。君子惜之，元配高恭人亦女丈夫也。適公時食貧茹苦，相勉以義。凡公讀書以及居官，佐其憂勤，勵其廉隅，恭人內助力居多焉。公被遣，恭人慨然從之。慰公曰：吾家食國恩厚矣。風雨雷霆，皆君惠也。君何感焉？公亦相對怡然。七載之間，艱難備嘗，毫不以介於意中。辛未春，公痼疾忽作，飲食湯葯，恭人親為經理，勞瘁成疾。以乙亥三月初七日先公卒，公哀甚，遂於是年九月二十日相繼即世。嗚呼痛哉！人孰無死，貴



得所死耳。公事親不愧，孝友出仕不負朝廷，死何足為公恨，而余之不能不為公悲者，蓋余與公生死患難交也。公病，余不及問，公歿，余不能見，冥冥之中，負此良友，靜言念之，不如無生，固不徒車過腹痛之傷，為足以謝我知己也。丙子有恩例，逐臣皆蒙放還，如天聖德，率土沾被，而公已不及待矣。嗚呼痛哉！公有子二人，長子泗，次子澆，扶櫬歸里。是年十月十九日，與高恭人合葬於萊邑城北二十里，旌旗之陽。子泗能文，工詩，足世其家。學後六年辛巳，以疾歿。澆亦翩翩稱令器，於骨肉情愛尤篤。泗子莘方幼，澆為之盡心撫養，至於成立。澆子茲，少年英發，蘄然見頭角。公之有後焉，必也。公葬時，合肥李文襄公已為之銘矣。庚寅春，澆及子侄輩復謀有以表厥墓，而屬余為之文。余誼不可辭，但愧不文，勿能揄揚其萬一，不過以公之生平叙公之始終，使百世後因余之言，想見公之為人。余老矣，旦暮見公於地下，庶幾借此以見余兩人之存歿無間，而公之不朽於古今者，亦未嘗不即此而在。是則後死者之責也。後之觀者，其將有感於是文。

康熙庚寅三月穀旦八旬老人孫熙頓首拜撰

號西康熙癸卯舉人本縣人

高公澹人事多不法，郭華野先生欲彈之。高公挽吾伯高祖緩頰，吾伯高祖為之力請。郭公諾之，當即焚草矣。乃於次日早朝劾之高公，懷甚適吾邑孫西山先生以孝廉居下位，有才莫展。吾伯高祖與同邑高福、山鹿、鄒平、馬冠，以郭公連名薦。



諸東撫東撫錢鈺為風憲所刻而疑郭公授之意遂以薦書上以為囑托不遂故啖其屬効已上覽竟不為意而高公之黨乃巧合趙高鹿馬事為罔君之尤上乃怒奪郭公職戎諸公於邊

伍元孫辛彤誌

先四叔曾祖樂安縣教諭續姚公行誼

先四叔曾祖崇張太恭人所生也崇禎丙子太恭人歸我高祖庚辰生四曾祖甫四歲而忠毅公殉邑難乃避地居鄉又以土寇為亂西南避兵顧艱難流離中兄弟自為師友不廢學公生而玉立眉目清朗筆墨秀發又博古力學長於詩賦諸兄皆以遠大期之太常公衡文江南江南士風桀驁有不服則榜書揭於通衢獨太常公試牒所臨諸生輒貰酒登高樓叅定甲乙以驗內之取舍未幾試案出而內之所次一如其外之所預定者則皆狂呼大噓以鳴得意時太常公總大綱而已公在署實操冰鑑遇奇古之作閱卷諸公或攢置不錄公取而丹黃之評斷之拔置前茅果出名下自是奮筆可否無不中其肯綮諸公皆作壁上觀也無如時命不偶弱冠而入庠而食餼矣至大試輒不得僅以康熙壬子拔貢教諭樂安十餘年丁張太恭人艱已老而重聽不能復出矣末年僻居鄉墅時陶咏以自適所著詩詞尤多號夏雲集每當大比之年後生小子輩有扶搖而起者猶感憤激發以自傷云



先高祖朝城縣訓導龍門公事畧

侄曾孫起檀謹誌

康熙辛丑春吾高祖卒於朝城學署迄今百有六年生平行實余馬能識然吾曾若祖所傳者先君子每詳言之故得述其厓畧焉先高祖諱蔚字龍門號中公又號幼公太高祖節愍公之少子也與伯高祖閻仙公同出於丁太宜人崇禎十六年二月初六日大清兵破萊陽太宜人逃出城外於三月初四日生吾高祖於馮家泊山莊距節愍公殉難時僅二十八日耳廬舍邱墟倉箱煨燼太宜人與嫡太高祖母張太恭人居漏濕中共哺育之有生之初遭遇如此不已為他日兆乎初太高祖母王恭人卒無出繼姜恭人生伯高祖眉魯公仲泰器公張太恭人其再繼也生四高祖續姚公我高祖總角時眉魯公顧而言曰吾兄弟皆習儒業無一知家人生產者非長久計五弟體豐偉可令理家務事農畝庶治詩書者無衣食累泰器曰耕讀固不可偏廢然五弟遺腹子遽令政業無以對先人且安知紹先志振家聲者非即此人乎於是從泰器公受業焉辛卯泰器公貢入成均壬辰會考歷下而眉魯公亦於是春成進士是時誨我高祖者惟閻仙公耳癸巳年十一仍受業於泰器公眉魯公已銓受萬年令矣



甲午閩仙公中副車丁酉戊戌聯捷成進士泰器公以朝考一等用知縣旋蒞任武義我高祖與續姚公以兄弟相師友朝夕切劘嗣續姚公入邑庠壬子拔貢丁卯授樂安教諭我高祖亦先於丙申歲補博士弟子員次年科試優等補府學增廣生員家門大有起色孰意眉魯公以拙於催科勒令休致癸卯閩仙公筮仕得粵東之瓊山欲携吾高祖之任以兩母留養不果行丙午閩仙公擢祠部郎迎養兩母我高祖奉丁太宜人至都越年餘以太宜人思奉嫡氏遂東歸癸丑眉魯公謝世乙卯丁太宜人卒我高祖與閩仙公哀毀骨立感動鄰里戊午除服補廩食餼壬戌閩仙公督學江左我高祖與續姚公偕行借以周覽山川開拓心胸焉甲子肄業成均滿授訓導己巳閩仙公以薦書被誣謫戍遠來當時親族戚友多避去不顧而我高祖從行萬里與共患難者七八年至丙子護喪歸張太恭人扶柩痛苦氣絕復甦庚辰正月二十七日泰器公又病故喜高祖哭之哀水漿不入口者數日蓋吾高祖之所以得讀書為文學中人者泰器公實左右之其哀固發於中情也是歲十月復丁張太恭人艱哀毀一如喪丁太宜人時一時外侮紛起真有不忍言者矣先是吾家祖產有牛口地數百畝良好泊地千餘畝郭家園地數百畝我七世祖母史太孺人治家勤儉又



益郭家園地四百畝茲數處者析產時諸伯高祖分耕焉我高祖以生於馮家  
海遂以馮家泊之地除荒場外僅四百餘畝而稅銀則三十餘金每至年豐穀  
賤時則艱於輸納我高祖家居日少一切事宜悉委仆輩有康熙十八年後國  
課全虧三十九年四十年間邑令嚴追比勒限清繳遂將熟地全售去稅糧亦  
皆過撥宵小乘間生心將所餘荒地一併印去奴仆逃亡食指日繁無以聊生  
幸我伯曾祖文水公尊閭仙公遺命令家人每歲助銀百兩雜糧三十石繭納  
十足以故康熙四十三年歲大飢猶不至歎星留也嗣後伯曾祖棄世伯祖東  
野公年幼家道中落不能照常供給我高祖亦於康熙五十三年司鐸朝城私  
計庶可支持孰知歷任八年竟卒於朝囊橐蕭然柩不能返我曾祖寄信東野  
公費五十金迎之始得旋里葬馮家泊之東鳳搏準頂距生於崇禎十六年癸  
未卒於康熙六十年辛丑享壽七十有九嗟呼我高祖有生之初既不獲睹父  
面尚幸兄弟眾盛可相扶持又不獲同居聚處焉傷矣朝夕勤誦不獲一第而  
又遭家不造喪敗疊更至於田園蕩盡匏繫冷官沒身齋署柩不能歸何其悲  
也此予小子當日聞之不覺涕零今追憶之猶不能不傷心而泣下者也述之  
願子孫之勿忘焉耳

元孫辛彤謹誌



鄉飲大賓仁菴趙公暨配王孺人傳

霽光進士  
德清知縣李

頌西音

仁菴趙公諱吾麟字子祥別號仁菴平谷大令馭黎先生之孫贈教授佐日先生之仲子出為伯父孝廉夢日先生之嗣配王孺人為明經王甫先生仲女公幼穎慧天性尤純篤過人崇禎癸未夢日先生以公車卒京邸公聞闢千里扶柩還鄉以家國多故藁葬塋側至明年三月鼎革公年甫十七外有雀鼠之爭內有仆隸之變仰天長號幾不欲生幸孺人適賦于歸而相慰相弔也兵燹甫定四壁蕭然孺人曰是無憂君但下帷攻苦衣食事吾自當之公感其意晝夜淬厲學業大進未幾學使按臨公遂入庠書香幾墜而復興孺人與有力焉庶毋王無子女公與孺人養之善既歿為治期年喪人皆義之先是嗣母李孺人之歿公方幼夢日先生之喪亦未盡禮是二者公終身有隱痛因糾族人為報本社歲再奠月再會訓諭諄切宗屬以睦筋力既衰晨夕猶拜禮家廟其諸事死如生事亡如存者與歲乙亥邑舉善士眾以公應邑令蔣公天麟給匾旌門嗣行鄉飲禮以公為正賓公與孺人皆賦性慷慨不以艱窶易慮生平恤孤賑貧遺金弗取買仆焚券嫁婢及時載在口碑一一可數子薦明經孫成進士僉謂大節克敦積善不倦所致也公享年七十有九孺人享年七十有八



候選主簿槐亭公行誼

公諱吾蕃字子庶號槐亭父獻苞公卒逾三月母周孺人始誕公幼警敏四五歲時嘗於母前問父年齒形容母奇之因告焉由是忽忽如有所失中夜輒泣醒問之則曰吾父來矣稍長就學過目能成誦未幾入太學考授主簿誦讀仍不輟逮值闖賊之亂奉母避難村居竭力供甘旨於學業始疏國朝定鼎復奉母入城奉養之餘以課子讀書為務洎諸子學業漸進輒喟然曰吾少失怙中歲復廢學嗣書香者將在若輩乎取先正文鱗次几案不憚委曲詳盡至丙夜不衰長子揪次子揭年皆弱冠偕遊庠序見者榮之公性和厚與人交能誠家計稍有餘即以佐宗戚之不給者尤喜獎掖後進其嗜學之心老而彌篤云壽至七十七歲而終

侄七世孫澎謹誌

雲騎尉統萬公行誼

公諱先甲字統萬驍果有胆氣幹力過人不喜讀幼在塾嘗憤然曰大丈夫當學萬人敵致身通顯安能終日呶呶作章句儒耶遂辭去與同邑李太初講武藝既成會明季賊首掃地王聚徒為民害公與太初率家丁數人乘夜攜其巢



親斬於陳甲申土寇入城殲令及尉又與太初率鄉兵討平之己丑寇復至眾逾千太初引數騎馳入賊營獲渠魁火龍王等數人公率眾乘之賊乃大潰悉奔馳自是相戒無犯境者公以功授雲騎尉不就製裝遊吳越時天下初定響馬肆行劫掠大江以南尤為盜藪公往返六千餘里手不持寸鐵偶遇之輒呵曰吾趙某也皆遁去經營數載家逾萬金年七十有二以壽卒於里

侄七世孫澎謹誌

文林郎東昌府教授青嶽趙君傳

靈化人  
檢討 丁 曄 仲昭

文林郎東昌府教授青嶽趙君考終於康熙二十二年六月二十四日年六十矣越三月其嗣君曰質持君狀來乞傳余念姻好重重未肯以病辭乃按狀而傳之傳曰君姓趙諱自立字子卓青嶽其號也先世萊陽人遷霑隸籍自德至諱思睿者為平谷令子三人長際昌萬曆壬子舉人次奕昌諸生次運昌附監生國朝詔授吳縣令引疾弗仕是為君考以君貴贈如君官子四人君為長幼聰慧過人年十四補博士弟子員旋以冠軍食廩值家中落茹淡攻苦經術大進順治庚子舉於鄉丁未會試以明通授教職得濟寧學正缺初抵官一室蕭然俸微不足供朝夕居處之泰然不以屑意與諸生約訂章程獎其率訓



而督其不率訓者士風蒸蒸日上未幾丁外艱服除起補萊陽縣教諭萊趙氏  
自出地也俗喜爭訟君乃先期置酒會族人定家規或有誤犯者族長即以家  
法治之由是終君任子姪鮮以事質公堂者已而遷東昌府教授之任則葺學  
宮新祭器諸生欣然樂從不數月而工竣撫憲施公給匾獎勵薦列未上而君  
無宦情則賦歸去來矣君三任為儒官廉潔自矢脩脯外無他取督課之嚴雖  
歷三地猶一色故其去也諸生咸泣送之君既致仕設帳於家邑中後進多所  
成就蓋與濟與萊與昌三庠之教澤相輝映也君事親孝葬祭皆遵古禮待諸  
弟友愛無間與人交久而能敬嗚呼此非所稱篤行之君子也與

先祖候選縣丞秋浦公行誼

祖諱子泌字鄴思號秋浦曾祖萬年公長子母劉孺人卒時甫九齡二十一父  
又見背仲叔父母撫訓成人祖父天性忠懇以純懿自矢尤篤倫常康熙己巳  
以叔父官太常獲譴慷慨赴難至則有遠左之謫時值嚴冬命下即發功令  
親屬不得隨行祖父詭他姓不避寒沍跋涉從之飲食扶掖左右供事不遺餘  
力太常公自筮仕後未經蹉跌當此抑鬱憤懣之中嘉其勤勞顧而歎曰疾風



勁草不意得之此子擬割膏腴以賜祖父跪泣曰兒豈以利來耶辭不受及抵奉天從祖子泗子澆得侍而家之外侮紛起矣太常公命吾祖歸禦委曲調護難平乙亥聞叔母高恭人棄世叔父亦沈綿牀第乃再出關以省謹侍湯藥無何太常公不起會兵征西域祖父匍匐入都哀顛當路奏開捐馬贖罪例乃得旨赦還扶柩旋里竭力襄事終始不懈士論以此多之祖父幼歷艱苦入庠後即援例入成均秉持家政內而繼母陳氏庶母蕭氏調劑和平為諸弟娶婦為幼妹遣嫁家務叢集外而應酬世故期表裡無憾不暇為章句學而不廢披覽末年祿仕不遂生計蕭索辟地鄉居時吟咏以自遣每為子孫講說學問之道以發於性情者為貴云年七十三卒詩有竹居集乾隆十七年貤贈文林郎

孫起檀誌

亡男郡廩生子汝墓誌銘

嗟余不德弗克凝茲天庥而降之戾人倫摧傷乃在暮景矣前之歲癸亥喪我老妻入室無托息身如寄以諸子趨承延至今慟未定而又奪我季子汝乎傷哉汝也汝則賢者也賢無祿又無嗣天之於賢豈曰無心任所遭而歸諸命乎又豈賢者之自立無當於天心其誠然者無以自必於吉凶善敗間耶或別有



所以程量之者耶嗟呼吾汝則誠賢者也夫服象美章身為度世所稱翩翩吉士乎而汝曰不然吾生平所以重輕者不在此也吾不衷是懼耳苟反躬無歉雖布素可矣余素任率口無諱言鄉之中譟曰直也激於詞不少容蓄諸子弟以為快而汝無快焉有間則啓余曰人有過吾弗正於未然救於將然既已然矣從而暴之望人以君子而先處人以不肖得無激而傷厚乎大人持世以言胡不度其可受而誘之使納於道與余奇其言以為苟合也從而察其私則實踐者也口不道人之短家之人以為然也國之人皆以為然也汝誠賢者也嗟吾汝居已約為無以自恣也絕非分以求安故於世無浮慕無畔援眾所趨汝若避之眾所畧汝若謹之其於學也亦若是嗟吾汝吾有汝固日冀其嗣吾先型者也其潛心致力將深造焉庶幾先大夫之所以為人所以為文者吾以為先大夫之啓佑在是也曾啓佑是而速之疾與汝至孝其居吾側亦猶是家庭宴處之節耳而若有所深慕於中者也又若有所甚詳於外者也吾之起居吾不自覺而汝早已得之晨夕間若深恐吾有不足於中而思有以啓之者慟哉汝也自癸丑吾無入室之歡而汝之所以曲體之者至矣曲體之而其心滋苦矣疾是以作也嗟乎性孝若此而奪之年乎嗟吾汝於倫無乖於世無忤可不



謂藹吉者乎而何以奪之年耶汝不妄交不計利不有私財用物必當性尚儉而非嗇也汝之交楊大木家貧汝嘗解衣伺其匱乏其長兄子連今年食少粟汝在病中令其婦納穀十石歸連汝固無厚蓄也諠所當盡其用物以為道矣嗟吾汝生平無不道之言無不道之行而報以無年以為命乎汝之構是疾也余初不知汝固不使余知之也及疾甚吾侄子泌始以告而已瘵莫之療汝猶懼重吾憂雖未安曰安也雖未食曰食也慟哉至孝若汝天不鑑卒使亡矣吾不復有汝矣汝亡國之人罔不慟心者曰汝無死理何以得死天固不冝使汝死者汝竟死矣汝無死理汝雖死猶生也乃吾不復有汝矣慟哉汝生於癸巳正月初八日子時卒於甲子十二月初十日午時年三十二娶高氏無子汝死高氏數以死從余以汝之賢不宜無後以我第三子子洙之次子名芄者立為文後高氏斷以義乃不死天乎汝乎如是已乎銘曰是亦足嗣是亦足壽非汝之自絕於天也可以無疾生為人慕死為人慟乃汝之所以為汝也庶其論定

勅授文林郎浙江金華府武義縣知縣



